

# JOHAN

## A CIAPAW THAWNGCHAWBIA

### *Bia cawh pungsaw tah a va cang*

<sup>1</sup> Ahrangthonah letah bia a ung. Ma bia cawh Khazing khatah a ung; Bia cawh Khazing a cang.

<sup>2</sup> Ahrangthonah taitah Khazing khatah a ung.

<sup>3</sup> Ama taco zezong vytei heh a tua, tuapaw hming vytei heh Ama tah a tua lypaw zehmai ung be. <sup>4</sup> Ama letaco hringnah a ung. Ma hringnah cawh cawngsaw vytei khainah a cang.

<sup>5</sup> Akhaipaw cawh a muinah hrong letah va khai ka, muinah taco ma cawh pahnei be.

<sup>6</sup> Cawngsaw pakheh Khazing tei a tawpaw ung ka, a ming cawh Johan a cang. <sup>7</sup> Khainah kong khah hni sá pawtah le reilai rua pawtah a va chua, ming vytei tah Ama a thongtah aa zing khy nápawtah. <sup>8</sup> Ama cawh akhaipaw cawh cang be, akhaipaw kong khah a hnikhuitu ruapaw tah a va chuhpaw a cang. <sup>9</sup> Akhaipaw hmuisuipaw, ming vytei a khai sahpaw cawh a ung, khazaw lehei a vong leimei.

<sup>10</sup> Ama cawh khazaw lehei a ung, khazaw heh Ama tah a tuapaw a cang naná teitah khazaw tah Ama cawh hnih be. <sup>11</sup> Ama a mehnung a cangpaw sahlo khatah a vong ka, a mehnung sahlo tah Ama cawh cyhlang bei he. <sup>12</sup> Canghrasala Ama a cyhlangpaw vytei, Ama a ming a zingpaw vytei cawh Khazing sawtei cangnah naw a peh he. <sup>13</sup> Ma sahlo cawh cawngsaw phunglang tah sahpaw cang bei

he. Taico cawngsaw biachawnah le pasaepaw dunah hratah sahpaw zong cang lytah Khazing taitah sahpaw a cang he.

<sup>14</sup> Bia cawh pungsaw tah a va lang ka, kaa hrong letah a cing lai. Paw tei a hnuitlakangpaw Sawcapaw hratah a rungnawnah zia kaa hmuh; ningdonah le biahmuisui tah a chih.

<sup>15</sup> Johan\* tah a konglang reilai ka, ma hrahei tlang a y, “Ma cawngsaw heh a konglang ka reipaw, ‘ka hninglang tah a va chuh lepaw cawngsawpaw cawh kama navy tah alai vypaw a cang, zecawtamaw tatah kama hlai tah a ung ciapaw a cang,’ tahpaw khah,” tatah a tah. <sup>16</sup> A ningdonah a tlangtlingnah taitah a bonghngang cawh sangkheh khy sangkheh tah kaa ting cy. <sup>17</sup> Phungbia cawh Moses letah peh cang ka, ningdonah le biahmuisui cawh Zisu Khri thongtah a va ung. <sup>18</sup> Ahotahmai tah Khazing cawh hmuh bang bei he. Canghrasala Sawcapaw hnuitlakangpaw, Paw khatei a ungpaw taco Khazing cawh a palang.

*Johan tah Mesiah a cang lynah kong a rei  
(Mt 3:1-12; Mk 1:1-8; Luk 3:15-17)*

<sup>19</sup> Jerusalem letei a ungpaw Juda cawngsaw sahlo tah tlangbui sahlo le Levi mingphing cawngsaw sahlo cawh Johan khaco taw he ka, “Ahomaw na cang?” tatah aa haesah tih he tah, Johan tah ma hrahei a bia a phy. <sup>20</sup> Ma sahlo hai letaco a paphah ly teitah, “Kama cawh Khri† cang bei neh,” tatah a palei he.

---

\* **1:15** Johan heh baptisma peitu a cang. † **1:20** Khri (Grik rei), le Mesiah (Hebru rei) aa silang cawh, Sathy thupaw,tahnah a cang.

<sup>21</sup> Aaning sahlo taco, “A cang caco ahomaw na cang? Elija na cang maw?” tatah aa tah.

Johan taco, “Cang bei neh,” a tah he.

“Khazing khuavang kaa haw thlangpaw cang cei?” tatah aa tah vy.

“Cang bei neh,” tatah a palei vy he.

<sup>22</sup> A changnah letaco, “Ahomaw na cang tahpaw achaw teitah ma ching tua. Aa ma siapaw sahlo hai letah zehratamaw kaa ta he a. Na konglang heh achaw teitah ma ching, ahomaw na cang?” tatah aa tah.

<sup>23</sup> Mataico Johan taco Khazing khuavang Isaiah a bia khah hmang ka, “Kama cawh, ‘Abuipaw cawtah langpui pading pah my lo,’ tatei raangcaaletei a y leimeipaw o cawh ka cang,”<sup>☆</sup> tatah a tah he.

<sup>24</sup> Taico aa tawpaw he Farasi thaikhehpaw sahlo taco Johan cawh ma hrahei bia aa hae hri, <sup>25</sup> “Zecawtamaw Khri na cang tlung lypaw le Elija maw, Khazing khuavang maw na cang tlung lypaw tah baptisma na cangsah he?” tatah aa tah.

<sup>26</sup> Johan taco, ma hrahei a palei he, “Kama taco tui tah baptisma ka ca cangsah he. Canghrasala naa hrong letei a ung thlangpaw, naa hni lypaw a ung. <sup>27</sup> Ama cawh ka hninglang tah a va chua a, kama cawh a phepakong rui a thlangpah tlangpaw hmai cang bei neh,” a tah he.

<sup>28</sup> Ma sahlo heh Jordan tuivaw raechai lang letei a ungpaw Bethani khua, Johan tei baptisma a cangsahnah pawhe letah a cang.

*Zisu, Khazing Tuu teitei*

---

<sup>☆</sup> **1:23** Isai 40:3

<sup>29</sup> Ningthlamongpaw letaco Johan tah Zisu cawh ama khatah a vong lai leimeipaw khah hmuh ka, “Mingtua o, Khazing tuu teitei, khazaw suanah a photu ruapaw kheh. <sup>30</sup> Ama heh, ‘Ka hninglang tah a va chuh lepaw cawngsawpaw cawh kama navy tah a lai vypaw a cang zecawtamaw tatah ama cawh kama hlai tah a ung ciapaw a cang,’ tatei a kong ka reipaw cawngsaw khah a cang. <sup>31</sup> Kama tah ama a cang tahpaw khah hnih bei neh. Canghrasala Israel cawngsaw sahlo khatah a va paly khy nápwatlah tui tah baptisma ka cangsah he,” tatah a tah.

<sup>32</sup> Taico Johan tah ma hrahei a tah, “Thlawpaw Pathai cawh avai taitah thury hratah a cung letah a za cawng thlangpaw khah ka hmuh. <sup>33</sup> Baptisma cangsah lai rua pawtei a pa tawpaw tah, ‘Thlawpaw cawh a cung letah a za cungpaw le, a cung letah a cawng thlangpaw na hmuh caco, ama cawh Thlawpaw Pathai tei baptisma a cang sahtu ruapaw a cang a,’ tatah pa ching lytah ung my seh la, ama cawh hnih a bei neh. <sup>34</sup> Atoheh cawh hmuh myca neh ka, ama cawh Khazing Sawcapaw a cang ceingei tahpaw khah ka rei ngang,” tatah a tah.

### *Zisu hningzuitu a hmetaw caipaw sahlo*

<sup>35</sup> A monglangpaw letah Johan cawh a hningzuitu pahning khatah ung he ka, <sup>36</sup> Zisu a khiakaly leimeipaw khah hmuh ka, a hningzuitu sahlo hai letaco, “Mingtua o, Khazing Tuu teitei khi,” tatah a tah.

<sup>37</sup> A hningzuitu pahning taco ma hratei bia a reipaw khah thui he ka, Zisu khah aa zui. <sup>38</sup> Taico

a hninglang a hui ka, Zisu tah aa hai leco, “Zemaw naa hui?” tatah a tah he.

Aaning taco, “Rabbi, (Cawngpahtu tahnah a cang) zeletamaw na ung?” tatah aa tah.

<sup>39</sup> “A vong la, naa hmuh thlang a,” tatah a palei he.

Taico aaning cawh a ungnah lang a vaw he. Chahningtlaw zailang suimehlang papali hrawng tai khah Ama khaco a ung he.

<sup>40</sup> Simon Piter a unypaw Andru cawh Johan bia a reipaw a thui paw pahning hrong letei Zisu a zuipaw khah a cang. <sup>41</sup> Andru taco a hmetawcai letah a unypaw Simon cawh huilai ka, a hai letaco, “Mesiah (ma cawh Khri tahnah a cang) cawh kaa hmuh thah,” tatah a tah.

<sup>42</sup> Taico Simon cawh Zisu khatah a va seikhui. Zisu taco ming ka, a hai letaco, “Johan sawcapaw Simon, nama cawh Sifas (ma cawh Piter tahnah a cang) aa ca tah myca a,” tatah a tah.

### *Zisu tah Filip le Nathaniel a y he*

<sup>43</sup> A ningthlamongpaw letaco Zisu cawh Galili raang lang sei pawtah a pachia. Taico Filip cawh hmuh ka, “Va pa zui,” tatah a tah.

<sup>44</sup> Filip cawh Andru le Piter sahlo khatei khuakheh letah a ung hruipaw a cang. Ma cawh Bethsaida khua a cang. <sup>45</sup> Filip tah Nathaniel cawh hmuh ka, a hai letah, “Moses tei phungbia letei a konglang a siapaw, Khazing khuavang sahlo zong tei a kong aa reipaw, Nazaret Zisu, Josef a sawcapaw cawh kaa hmuh myca,” tatah a tah.

<sup>46</sup> Nathaniel taco, “Nazaret taitah hmingchaw a piathai thlang maw?” a tah.

Filip taco, “A vong la, mingtua,” tatah a tah.

<sup>47</sup> Zisu tah Nathaniel cawh Ama lang a va pange lai leimeipaw khah hmuh ka, “Mingtua o, Israel cawngsaw hmuisuipaw, Ama letah dinglynah a ung lypaw hi,” a tah.

<sup>48</sup> Nathaniel taco, “Zekhatamaw na pa hni?” a tah.

Zisu tah a hai letah, “Filip tei a ca y hlai letei thuiku kung rai letah na ung thlangning takhei, ka ca hmuh,” tatah a tah.

<sup>49</sup> Nathaniel taco, “Rabbi, nama cawh Khazing Sawcapaw, Israel Siangpahrang na cang,” tatah a tah.

<sup>50</sup> Zisu tah, “Thuiku kung a rai letah ka ca hmuh, ka tah cawtah na zingpaw cang ka, ma navy hei a rungnaw vypaw a hlupui na hmuh tae a,” tatah a tah. <sup>51</sup> “Biahmuisui ka ca ching, avai ingkaw a hong a ka, Khazing a vaiming sahlo cawh Cawngsaw Sawcapaw cung letah aa cungchuh, aa kechypaw khah na hmuh tae a,” tatah a tah vy hui.

## 2

### *Zisu tah tui cawh misurhang tah a cangsah*

<sup>1</sup> A ningthungnah letah Galili raang, Kana khua letah nupui chuinah a ung. Zisu a no cawh ma leco ung ka, <sup>2</sup> Zisu le a hningzuitu sahlo zong cawh ma nupui chuinah leco aa hrui hrah he. <sup>3</sup> Misurhang a chang tihtah, a no tah Zisu hai letaco, “Misurhang a chang thah,” tatah a ching.

<sup>4</sup> Zisu tah a hai letah, “Dopaw canu, nama tah zemaw na pa ching rua a ung? Ka cai phah balang be hi,” tatah a tah.

<sup>5</sup> Taico a no taco cungtlahtu sahlo hai letaco, “A ca chingpaw longmang hratah tua my lo,” tatah a tah he.

<sup>6</sup> Aa kaepang tei letaco alung beirai sangruh, Juda cawngsaw sahlo tei a sipathainah aa tah-paw cai letei aa hmang teipaw cawh ung ka, ma alung beirai sangkheh cawh tui kalan songthung hrawng a tlungpaw a cang.

<sup>7</sup> Zisu tah cungtlahtu sahlo hai letaco, “Beirai sahlo lekhei tui chi sah my lo,” a tah he. Taico alung beirai cawh a tlang tai long tah tui aa chisah he.

<sup>8</sup> Taico Zisu tah aa hai letah, “Atoheh alung beirai letei tui cawh thai la, cung a tlahpaw sahlo hruitupaw khah va pei o,” tatah a tah.

Taico thai he ka, aa va peh. <sup>9</sup> Cungtlah hruitupaw taco misurhang tah a cang thah ciapaw tui cawh a pateh. Canghrasala zehratamaw ma hraco a cang tahpaw khah hnih be, tui a thaipaw he cungtlahtu long takhei aa hni. Taico nupui a chuipaw khah y ka, a hai letaco, <sup>10</sup> “Cawngsaw maikaw tah misurhang a hring khah va tle taw he ka, khuachai vytei tah dutaw tah aa ding khy taitah a hning tah a tesi aa va tle tei. Nama duitei cawh athoning tei navy tah achaw vypaw khah ato tingtai na pakhei thlang,” tatah a tah.

<sup>11</sup> Galili raang, Kana khua letei Zisu tah a tuapaw, ma ningang chuipaw heh a tuapaw letah a hmetaw caipaw a cang. A rungnawnah cawh palang lai ka, a hningzuitu sahlo taco Ama letah aa zingnah khah aa pahnia.

*Zisu tah behnah ing a pathaisah  
(Mt 21:12-13; Mk 11:15-17; Luk 19:45-46)*

<sup>12</sup> Ma khy taico a no le a uny sahlo le a hningzuitu sahlo khaco Kapernaum khua lang cawh cungthlah he ka, ma leco ning cuitei a cang he.

<sup>13</sup> Taico Juda cawngsaw aa Khungsai Panawnah cai cawh phah daimang ka, Zisu cawh Jerusalem lang a sei. <sup>14</sup> Jerusalem letei behnah ingdung chung letei a ungpaw sahlo, sahring a zuapaw le tuu le thury sahlo a zualaipaw le cabuai letei tangka a thlaipaw sahlo khah a hmuh he.

<sup>15</sup> Mataico khyhruai cawh thingrui tah tua ka, behnah ingdung chung letei a ungpaw tuu le sahring vytei cawh zeipatlau he ka, a papia thlu he. Tangka a thlaipaw sahlo aa tangkasaw vytei khah thehly pah thlu he ka, aa cabuai sahlo vytei khah a palehly thlu he. <sup>16</sup> Thury aa zualaipaw sahlo aa hai letaco, “Piathlah thlu tua o, zekhata-maw ka Paw a ing cawh cho donah tlang tah naa tua ngang zia?” a tah he.

<sup>17</sup> A hningzuitu sahlo cawh, “Na ing caw tei ka chahnai ngenah taco a pa e seh thlu myca,”<sup>☆</sup> tatei aa ciapaw bia khah a thui he.

<sup>18</sup> Taico Juda cawngsaw sahlo taco, “Ma hming vytei tua rua pawtah hei naw na hnui tahnah tah zehapaw ningang chuipaw paching pakhanah maw na ma pae a?” tatah aa tah.

<sup>19</sup> Zisu taco aa hai letah, “Ma behnah ing heh chehthlah la, ningthung chung tah ka padaw kaw thlu cehceh a,” a tah he.

<sup>20</sup> Juda cawngsaw sahlo taco, “Ma behnah ing heh kung songli le kung ruh sahpaw tah cang ka, ma cawh ningthung chung tah na paling khy maw?” aa tah. <sup>21</sup> Canghrasala a rei dunah silang

---

<sup>☆</sup> 2:17 Hlaw 69:9



cawh Ama a pungsaw kong khah a cang hri. <sup>22</sup> Thihnah taitah a tho kaw khy taitah ma hrarei bia a reipaw khah a hningzuitu sahlo tah a thui kaw he. Capathai letei a ungpaw le Zisu hmokaw bia sahlo khah aa zing.

<sup>23</sup> Jerusalem letei Khungsai Panawnah chung letaco, Zisu tah ningang chuipaw paching pakhanah a hlupui a tuapaw sahlo khah ming hlupui tah hmuh he ka, a ming cawh aa zing.

<sup>24</sup> Canghrasala Zisu cawh aaning sahlo letaco a ngengang be, zecawtamaw tatah ming vytei khah a hmuh pahleh thlu he. <sup>25</sup> Cawngsaw kong cawngsaw tah chingpase khah Zisu cawh hia be, zecawtamaw tatah Ama tah cawngsaw chung letei a ungpaw khah a hni thlu.

### 3

#### *Zisu tah Nikodema a cawngpah*

<sup>1</sup> Farasi hrong letah pakheh, a ming Nikodema aa tahpaw cawh ung ka, ama cawh Juda cawngsaw sahlo a uhtu khongsil macang hrong leteipaw a cang. <sup>2</sup> Zaicing tah Zisu khaco a vong ka, a hai leco, “Rabbi, nama cawh Khazing taitei a va chuh-paw cawngpahtu na cang tahpaw kaa hni. Khazing tah a unghui ly caco he na tuapaw hming hapaw ningang chuipaw paching pakhanah heh ahotahmai tah tua khy bei he,” a tah.

<sup>3</sup> Zisu tah ma hrahei a palei, “Biahmuisui ka ca ching, ahohmai aa pitha ly caco, Khazing painah raang hmuh khy bei he,” tatah a tah.

<sup>4</sup> Nikodema taco, “Cawngsaw cawh a macang khy taitah zekhatamaw a pitha thai khaw a? A no

a chi chunglang a nae kaw tah a pi kaw thai khawh tlung be,” tatah a tah.

<sup>5</sup> Zisu tah ma hrahei a chai, “Biahmuisui ka ca ching, ahohmai tui le Thlawpaw tah a pi ly caco, Khazing painah raang a nae bei he. <sup>6</sup> Ngaisaw taco ngaisaw a sah kaw, Thlawpaw taco thlawpaw a sah hrah. <sup>7</sup> ‘Na pitha ruapaw a cang,’ tatei ka ca tahpaw heh na ningang kheh seh. <sup>8</sup> Thli cawh a dudú tah a hrang, a pyraw na thui. Zelang tamaw a va chua, zelang maw a sei a tahpaw na hni tlung be. Thlawpaw tah a pipaw cawh ma hraco aa cang,” tatah a tah.

<sup>9</sup> “Ma hapaw cawh zekhatamaw a cang thai a?” tatah Nikodema taco a hae hri kaw.

<sup>10</sup> Zisu taco, “Israel cawngsaw sahlo cawng-pahtu a cangpaw tah ma hapaw hming sahlo cawh hnih thai bei ceh maw? <sup>11</sup> Biahmuisui ka ca ching, hnih peh ka, kaa rei, kaa hmuhpaw kong khah kaa rei lai, canghrasala kaa reipaw khah naaning tah zing tlung bei he ceh. <sup>12</sup> Aluicung hming kong ka reipaw hmai naa zing tlung be, vaicung lang kong sahlo cawh ca ching my he neh seh la, zekhatamaw naa zing khy thai a? <sup>13</sup> Cawngsaw Sawcapaw, vaicung taitei a vongpaw cy tah ly co ahohmai tah vaicung lang aa ke bang tlung be. <sup>14</sup> Moses tei raangcaa letah daa pari a caliapaw hratah Cawngsaw Sawcapaw heh calia a cang hrá a. <sup>15</sup> Macawtaco Ama a zingpaw maikaw cawh chaizaw tah a hring he a.

<sup>16</sup> Khazing tah khazaw heh a do ngeteinah caw-tah a Sawcapaw hnuitlakangpaw khah a peh. Ahohmai a zingpaw maikaw cawh lyde lytah chaizaw hringnah aa hnui a. <sup>17</sup> Khazaw heh thaily

cang sá pawtah Khazing tah a Sawcapaw cawh a tawpaw cang be, Ama a thongtah pachah aa cang khy nápwatá a tawpaw khah a cang hri. <sup>18</sup> Ama a zingpaw maikaw cawh thaily cangsah cang a bei he. Canghrasala a zing lypaw maikaw cawh ato lalei hei thaily a cang thah he, Khazing Sawcapaw hnuítlakangpaw ming aa zing lynah cawtah a cang. <sup>19</sup> Ma heh thaily cangnah cawh a cang. Akhaipaw cawh khazaw lehei a vong ka, canghrasala cawngsaw tah a khaipaw navy tah a muipaw aa tlechai vy, zecawtamaw tatah aa hming tuapaw sahlo khah a chahlynah cawtah a cang. <sup>20</sup> Ahohmai hmingchaw ly a tuapaw maikaw taco akhaipaw a hua he, taico akhaipaw lang zong a vong du bei he, hmingchaw ly aa tuapaw khah akhaipaw letah a langpang le tahpaw aa cinah cawtah a cang. <sup>21</sup> Canghrasala biahmuisui letei a hringpaw taco akhaipaw lang cawh a vong he. Aa tuapaw hming vytei khah Khazing thongtah aa tuapaw a cang tahpaw khah a lang pase khy nápwatá,” tatah a tah.

*Baptisma peitu Johan tah Zisu kong a rei*

<sup>22</sup> Ma khy taico Zisu cawh a hningzuitu sahlo khatah Judia raang khuatei lang khah sei he ka, ma letaco zemaw cai hrawng ung ka, baptisma zong a cangsah he. <sup>23</sup> Mataico, Johan zong tah Salim khua kae Ainon aa tahpaw letaco baptisma cangsah he ka, cawngsaw hlupui tah ama khatah baptisma cang rua pawtah aa pange. Zecawtamaw tatah ma leco tui ahlunah cawtah a cang. <sup>24</sup> Ma heh Johan cawh thong letah a tlah hlai tah a cang. <sup>25</sup> Johan hning a zuipaw sahlo thaikhehpaw

le Juda cawngsaw pakheh cawh a sipathainah phungle lang kong letah bia a ei he. <sup>26</sup> Johan khaco a vong he ka, a hai leco, “Cawngpahtu, Jordan tuivaw rae lang letei nama khatah a ungpaw, a konglang na reilaipaw takhei baptisma cangsah he ka, cawngsaw hlupui tah aa pange,” tatah aa ching.

<sup>27</sup> Johan taco, ma hrahei a palei he, “Vaicung taitah pehpaw suipaw khah cawngsaw taco a hnui khypaw a cang. <sup>28</sup> Kama cawh, ‘Khri cang bei neh, zua a ky ruapaw tei a hmelang a seilai ruapaw tah tawpaw ka cang,’ ka tahpaw khah naaning sahlo ceingei tah naa hni. <sup>29</sup> Myno cawh my a hnuitupaw cawtah a cang. My a hnuitupaw a vesaw a cangpaw taco ama cawh heh thlang ka, a naw thlia paria thlang. My hnuitu o cawh a thui tih letaco a thaw a chah ngetei. Ma a lawngnah cawh kama ka cawtah cang ka, atoheh a va tlung thah hi. <sup>30</sup> Ama cawh a laisui ruapaw a cang, kama cawh a zochuh ruapaw ka cang.

<sup>31</sup> Cung lang taitah a va chuhpaw cawh ming vytei cung letei a ungpaw a cang, aluicung taitei a chuhpaw cawh alui cawngsaw cang ka, aluicung kong khah a rei. Avai taitei a va chuhpaw cawh ming vytei cung letei a ungpaw cawh a cang. <sup>32</sup> A hmuhpaw le a thuihpaw khah a thuisah he, canghrasala a thui sahpaw he bia cawh ahotah-mai nge bei he. <sup>33</sup> A bia a ngepaw taco Khazing cawh a ding hmuisui tahpaw khah a pacysah. <sup>34</sup> Khazing tawpaw a cangpaw taco Khazing bia khah a rei. Zecawtamaw tatah Khazing taco ama cawh a Thlawpaw khah ri tai ung lytah a peh.

<sup>35</sup> Paw tah Sawcapaw khah a do, zezong vytei khah a kih letah a chia. <sup>36</sup> Sawcapaw a zingpaw maikaw taco chaizaw hringnah aa hnui. Sawcapaw a pawng lypaw maikaw taco hringnah hnui bei he, Khazing thingaenah khah aa cung letah a ung hri a,” tatah a tah.

## 4

### *Zisu le Samaria canu bia reihruinah*

<sup>1</sup> Farasi sahlo taco Zisu tah Johan navy tah hn-ingzuitu hlu vy a hnuipaw le ming hlu vy baptisma a cangsah paw he khah aa thui. <sup>2</sup> Zisu ceingei tah baptisma cawh a cangsah bei he, a hn-ingzuitu sahlo tah aa cangsah he. <sup>3</sup> Ma kong cawh Abuipaw tah thui ka, Judia raang cawh piasai ka, Galili raang lang khah a sei kaw.

<sup>4</sup> Samaria raang cahrong tah sei pawtah cang ka, <sup>5</sup> Samaria raang khua, Saikar aa tahpaw cawh va phah ka, ma cawh Jakob tei a sawcapaw Josef a pehpaw hminghmaw kae leteipaw khah a cang. <sup>6</sup> Ma leco Jakob tei tuikho a copaw cawh a ung. Zisu cawh khuatlongnah langpui letei a va sei lainah letaco a thaw bang ka, ma tuikho kae letaco a ty ka, a hia. Ma cawh ningching hrawng letah a cang.

<sup>7</sup> Taico Samaria cawngsawno pakheh cawh ma tuikho letei tui cawh thai rua pawtah va chuh ka, Zisu tah a hai leco, “Tui ding ruapaw pa pei khy ceh maw?” tatah a tah. <sup>8</sup> A hningzuitu sahlo khah khuachung lang e ruapaw cawh tah a sei thah he.

<sup>9</sup> Samaria cawngsawno taco, “Nama cawh Juda mingphing cang ceh ka, kama cawh Samaria mingphing cang neh ka, zekhatah zia tamaw tui

ding ruapaw na pa hae thlang?” a tah. Juda mingphing sahlo cawh Samaria mingphing khatah a pahlawh bei he.

<sup>10</sup> Zisu taco a hai letah, “Khazing lahsong le nama khatei tui ding ruapaw a ca haepaw heh cawh hnih tua la, nama tah ama khatah tui ding ruapaw na hae hri ruapaw a cang; taico ama tah hringnah tui cawh a ca pae a,” tatah a tah.

<sup>11</sup> Canuno taco, “Ka pu, ma tuikho heh a thuh ngeteipaw tah cang ka, tuithai nápaw zehmai na hnui tlung be. Zekhatamaw hringnah tui cawh na hmuh khy thai zia a? <sup>12</sup> Kaa mapaw Jakob navy tah na rungnaw vy maw? Ama taco ma tuikho heh ama le a sawtei leh vytei le, aa sahring zuapaw vytei, ding ruapaw tah a ma pehpaw a cang hi,” a tah.

<sup>13</sup> Zisu tah ma hrahei a chai, “Ma tui a dingpaw maikaw heh cawh aa tui a hrae kaw a.

<sup>14</sup> Canghrasala kama tei ka pehpaw tui a dingpaw maikaw he cawh aa tui hrae khaw be. Ka pehpaw he tui cawh aa chung taitah tuihnaw hratah a laichua a, chaizaw hringnah tai a lai a,” tatah a tah.

<sup>15</sup> Canuno taco, “Ka pu, ma tui cawh pa pei tua, ka tui a hrae khawh ly nápawtah le ma tuikho lehei tui ka va thai khawh ly nápawtah,” a tah.

<sup>16</sup> Canuno cawh, “Va sei la, na pasae va y la, a vong kaw my lo,” tatah a tah.

<sup>17</sup> Canuno taco, “Pasae ka hnui tlung be” tatah a palei.

Zisu tah a hai letah, “Pasae hnui bei neh, na tahpaw heh biahmuisui a cang. <sup>18</sup> Hmuisui teico, pasae papangaw na hnui thah, atotei na ung

hruipaw cawngsaw zong heh na pasae hmuisui cawh cang hlui be, na reipaw heh biadih a cang,” tatah a tah.

<sup>19</sup> Canuno taco, “Ka pu, nama heh Khazing khuavang na cang tahpaw ka hni, <sup>20</sup> aa ma path-lahtu sahlo tah ma tlaang lehei Khazing aa beh tei. Canghrasala naaning Juda mingphing sahlo taco Jerusalem letah Khazing cawh beh rua a cang tatah naa tah,” a tah.

<sup>21</sup> Taico Zisu tah a hai letah, “Canuno, ka bia heh zing tua, a cai le ning a va tlung leimei, ma tlaang lehei a cang ly leh Jerusalem letah cang lytah Paw Khazing aa behnah cai khah a tlung a. <sup>22</sup> Naaning Samaria mingphing taco naa hni lypaw khah naa beh tei, pachahnah cawh Juda mingphing taitah a va chuhpaw a cangnah cawtah kaaning taco kaa behpaw khah kaa hni. <sup>23</sup> Paw cawh a beh hmuisuipaw sahlo tah Thlawpaw le biahmuisui tei aa beh nápaw cai cawh a va chuh myca, atoheh a va phah thah. Ma hapaw cawngsaw cawh Paw tah a huipaw a cang he. <sup>24</sup> Khazing cawh Thlawpaw cang ka ama a behpaw sahlo taco thlawpaw le biahmuisui tah aa beh hrahing ruapaw a cang,” tatah a tah.

<sup>25</sup> Canuno taco a hai letah, “Mesiah (ma cawh, ‘Khri,’ tahnah a cang) a va chuh tae a tahpaw ka hni. Ama cawh a va chua tihtah hming silang vytei khah a ma chingpase tae a,” tatah a tah.

<sup>26</sup> Zisu tah a hai letaco, “Nama kha bia a rei leimeipaw heh Ama cawh ka cang,” tatah a tah.

*Hningzuitu sahlo Zisu kung a va tlung kaw he*

<sup>27</sup> A hningzuitu sahlo cawh aa va tlung kaw tihtah Zisu cawh canuno khatei bia aa reihru

leimeipaw khah hmuh he ka, aa ning a ang thlang. Canghrasala ahotahmai tah, “Zemaw ma canuno khakhei na hiapaw a ung? Ze kong maw naa reihruai leimei?” tatah hae hri bei he.

<sup>28</sup> Taico canuno cawh a tuibei khah seisai ka, khuachung lang khah va sei ka, khuasaw sahlo hai letaco, <sup>29</sup> “A vong la, va ming tua o, ka tu-  
 asenah maikaw a pa ching thlu khypaw cawng-  
 saw pakheh a ung, Khri a cang khy mai!” a tah  
 he. <sup>30</sup> Khuachung letei cawngsaw sahlo cawh ka  
 piathlah he ka, Zisu ungnah lang aa va pange.

<sup>31</sup> Ma chung taco a hningzuitu sahlo tah,  
 “Cawngpahtu, sangkheh kheh e taw,” tatah aa  
 tah.

<sup>32</sup> Canghrasala Zisu taco aa hai letah, “A kong  
 naa hni lypaw e ruapaw batui ka hnui,” tatah a tah  
 he.

<sup>33</sup> Mataico a hningzuitu sahlo cawh aaning le  
 aaning khah, “Batui a va peipaw ung ta he maw!”  
 tatah a tah he.

<sup>34</sup> Zisu tah aa hai letah, “Ka batui cawh a pa  
 tawtu a dunah tua le a rai patlung patlia khah a  
 cang. <sup>35</sup> ‘Thlah pali khy taico saze hre a cang a,’  
 tah tei bei he ceh maw? Ka ca ching he hi, naa  
 meh duichy la, saze ly khah mingtua o! Hre rua  
 pawtah a zaw thlu myca he khi. <sup>36</sup> Saze a hrepaw  
 tah a hrenah mai cawh a hmuh tei. Chaizaw  
 hringnah caw pawtah aa hre myca. Ma pawsui  
 co, saze a lingpaw le a hrepaw cawh a lawng hruai  
 khy he a. <sup>37</sup> Ma tih taco, ‘Pakhehpaw tah ling ka,  
 pakhehpaw tah a hre,’ tahpaw cawh ahmang a.  
<sup>38</sup> Naa ling lypaw saze hre rua pawtah ka ca taw he  
 hi. Ming hringpaw sahlo tah raisah cawh hre he



ka, aa raihrenah a thuipa cawh naaning tah naa hria,” a tah he.

*Samaria cawngsaw hlupui tah aa zing*

<sup>39</sup> Saikar khuachung letei a ungpaw Samaria cawngsaw a hlupui tah canuno tei, “Ka hming tua ciapaw vytei a pa ching khy thlu,” a tahpaw rawng takhei Ama cawh aa zing. <sup>40</sup> Macawtaco, Samaria cawngsaw sahlo cawh Ama khaco a vong he ka, kaaning kha caang cong thlang tatah thly he ka, ninghning aaning khatah a caang. <sup>41</sup> Taico, a cawngpahnah bia thong khei, mehlupui tah Ama cawh aa zing.

<sup>42</sup> Canuno hai letaco, “Nama tei na reinah thong-tah kaa zingpaw cang lytah kaaning ceingei tah thui peh ka, ma paw cawngsaw heh khazaw Pachahtu hmuisui a cang tahpaw kaa hninah caw-tah a cang,” tatah aa tah.

*Zisu tah abui pakheh a cangpaw a sawcapaw a dangsah*

*(Mt 8:5-13; Luk 7:1-10)*

<sup>43</sup> Ninghning khy tah ma khua taico piathlah ka, Galili raang lang a sei. <sup>44</sup> Zisu tah, “Khazing khuavang cawh ama a khua le raang letaco pasung panawnah a tong be,” tahpaw bia khah a rei. <sup>45</sup> Canghrasala Galili raang cawh a va phah tihtah Galili cawngsaw sahlo taco Zisu cawh aa cyhlang. Khungsai Panawnah ning tei Jerusalem khua letah a tuapaw vytei khah aa hmuh, zecawtamaw tatah ma lekhei a ung thlang hrah he.

<sup>46</sup> Zisu cawh tui misurhang tei a cangsahnah hminghmaw, Galili raang letei Kana khua lang khah a va sei kaw. Ma leco abui pakheh a cangpaw

a sawcapaw, Kapernaum khua letah a ungpaw cawh dang be. <sup>47</sup> Ma cawngsawpaw taco Zisu cawh Judia raang taitah Galili raang a va phah tah-paw khah a thui tihtah ama khaco a vaw ka, a thi daimangpaw a sawcapaw cawh dang sá pawtah a vong theh ky law tatah a va naw.

<sup>48</sup> Zisu tah ma cawngsawpaw hai letah, “Naaning sahlo taco ningang chuipaw paching pakhanah le khuarawha a chuipaw naa hmuh tah lypaw co zing by bei ceh,” tatah a tah.

<sup>49</sup> Ma abuipaw taco, “Abuipaw, ka sawcapaw a thih hlai lehei a vong theh ky,” tatah a tah.

<sup>50</sup> Zisu taco, “Va sei thlang, na sawcapaw cawh a hring a,” tatah a palei.

Ma cawngsawpaw taco Zisu tei a hai letah bia a reipaw cawh zing ka, a sei hly. <sup>51</sup> Lang letah a seilai leimeining taco, a sae sahlo tah va dai he ka, na sawcapaw a dang thah tahpaw aa thuisah. <sup>52</sup> A sawcapaw cawh zening cai hrawng taikhei maw a chah vy longmang tahpaw khah a hae tih he tah a hai leco, “Ziachaning, zailang suimehlang pakheh hrong taikhei a thlasih taco a thlaw,” tatah aa tah.

<sup>53</sup> Mataico a paw taco, ma cawh Zisu tei, “Na sawcapaw cawh a hring a,” tatei a chingpaw cai a cang hrahing takhah a hni. Macawtaco ama le a ingchungkho vytei tah aa zing.

<sup>54</sup> Ma heh Judia raang taitah Galili raang a va phah khy taitei Zisu tah a tuapaw a uihningnah ningang chuipaw paching pakhanah a cang.

## 5

### *Tuiching letei dangsahnah*

<sup>1</sup> Cai a cawngpe khy tai khei Juda cawngsaw sahlo Panawnah letah a hlo hra pawtah Zisu cawh Jerusalem lang khah a kechy. <sup>2</sup> Jerusalem khuapui letei Tuu Hawkaw aa tahpaw kae letaco, tuiching, Aramaik rei tah Bethesda aa tahpaw ung ka, dungkalung sangpangaw a hnui. <sup>3</sup> Ma letaco mehdang ly hlupui, mehco le a songbepaw, a kih le phe a ngawpaw sahlo vytei taco, tui a calawh lepaw khah aa haw thlang. <sup>4</sup> Ma tuiching cawh vaiming sahlo tah a calawhsah tei he ka, ma tui a calawh ning tei a chunglang a zythlah tawpaw he cawh zehapaw a sawnah a cangpaw hmai tah dangnah aa hmuh tei. <sup>5</sup> Ma leco cawngsaw pakheh a dang lypaw kung songthung leh kung reh a sah siapaw a ung. <sup>6</sup> Zisu tah ma cawngsaw cawh hmuh ka, ma leco khua sypui dang lytah a ung myca tahpaw khah hnih ka, a hai letah “Dang na du maw?” tatah a tah.

<sup>7</sup> Mehdang ly taco, “Abuipaw, ma tui heh a calawh cangkawleh tui chunglang a pa nong rupaw ahohmai ung bei he. A nawng pawtah ka seining maikaw tah cawngsaw ahringpaw tah aa pa chokhai thah leimei thlang,” tatah a palei.

<sup>8</sup> Zisu taco a hai letah, “Tho la, na iphaw a lah la, sei,” tatah a tah. <sup>9</sup> Sung sungkheh tah ma cawngsaw cawh dang ka, a iphaw cawh law ka, a sei.

Ma ning cawh Sabat\* ning a cang. <sup>10</sup> Juda cawngsaw sahlo taco, “Atoning heh Sabat ning cang ka, na iphaw law khy bei ceh, a phung cang be,” tatah aa tah.

---

\* 5:9 Sabat cawh, Juda cawngsaw sahlo a hianah ning, a cang.

<sup>11</sup> Ama taco aa hai letah, “A pa dangsah tupaw tah, ‘Na iphaw law la, sei law,’ a pa tah,” tatah a tah he.

<sup>12</sup> Aaning sahlo taco, “Na iphaw law la, sei a ca tahpaw cawh ahomaw?” tatah aa hae.

<sup>13</sup> Dangsah a cangpaw cawngsawpaw taco a dangsah tupaw khah hnih pase be, zecawtamaw tatah Zisu cawh ma leteipaw zawpui hrong taico a seihly.

<sup>14</sup> A hning khy tah ma cawngsawpaw khah Zisu tah behnah ing letah hmuh ka, “Na dang myca hi, atohei co suanah va tua khawh kheh, na tua vy caco a sah vy tah maw na cung letah tlung pang le,” tatah a tah. <sup>15</sup> Cawngsawpaw cawh seihly ka, a dangsahtu khah Zisu a cang tahpaw cawh Juda cawngsaw sahlo khah a ching he.

### *Sawcapaw thongtah hringnah*

<sup>16</sup> Macawtaco Zisu tah ma hming sahlo cawh Sabat ning tah a tuanah cawtah Juda cawngsaw sahlo taco Ama cawh ruhanah aa peh. <sup>17</sup> Zisu tah aa hai letah, “Ka Paw tah atoning tai a rai hre ka, kama zong ka hre hrápaw a cang,” a tah he.

<sup>18</sup> Ma rawng tahei Juda cawngsaw sahlo taco thaw rua pawtah kheh a zawng tima he; Sabat ning a ronah caw tahei long cang lytah Khazing khah Ama a Paw tatah a y cawtah le Khazing kha a khing pawtah a tuanah cawtah a cang.

<sup>19</sup> Taico Zisu tah aa hai letah, “Biahmuisui ka ca ching he, Sawcapaw tahei ama teitah zehmai tua khy be, Paw tei a tuapaw a hmuhpaw longlong khah a tua khy, zecawtamaw tatah Paw tei a tuapaw maikaw khah Sawcapaw zong tah a tua

hrah. <sup>20</sup> Zecawtamaw tatah Paw taco Sawcapaw khah do ka, a tuapaw vytei khah a hmuhsah. Naa ningangnah rua pawtah ma sahlo navy hei a rungnaw vypaw hming sahlo a hmuh sá a. <sup>21</sup> Zecawtamaw tatah Paw tah mehthi patho he ka, hringnah a pehpaw he hratah Sawcapaw zong tah peh a dupaw khah hringnah cawh a peh hrah he. <sup>22</sup> Ma hlui co, Paw tah ahohmai biacepah bei he, canghrasala biacenah vytei khah Sawcapaw letah a peh thah, <sup>23</sup> ma cawh Paw aa cizawpaw hratah Sawcapaw aa cizaw khy nápwaw cawtah a cang. Sawcapaw a cizaw lypaw taco ama a za tawpaw Paw khah cizaw hrah be.

<sup>24</sup> Biahmuisui ka ca ching he, Ka bia thui katei, a pa tawtupaw a zingpaw cawngsaw cawh chaizaw hringnah hnui ka, sua phosah cang a be. Ama cawh thihnah taitah hringnah lang khah a palang thah. <sup>25</sup> Biahmuisui ka ca ching he, mehthi tah Khazing Sawcapaw a o thui he ka, a thui paw sahlo taco hringnah aa hmuh nápwaw cai cawh va chuh leimei ka, atoheh a va phah myca. <sup>26</sup> Zecawtamaw tatah Paw cawh Ama teitah hringnah a hnuipaw hratah, a Sawcapaw khah Ama teitah hringnah hnuinah naw a peh. <sup>27</sup> Taico Ama cawh Cawngsaw Sawcapaw a cangnah cawtah biacenah nawhnuinah zong khah a peh.

<sup>28</sup> Ma heh naa ningang kheh seh, zecawtamaw tatah athlai letei a ungpaw vytei tah a o thui a he ka, <sup>29</sup> aa tho nápwaw cai cawh a va chuh leimei myca. Chahnah a tuapaw sahlo cawh hringnah letah tho a he ka, chianah a tuapaw sahlo cawh thaily cang rua pawtah a tho he a. <sup>30</sup> Kama cawh ka naw tah

zehmai tua khy bei neh. Ka thui paw hratah biace neh ka, ka biace paw cawh a ding, zecawtamaw tatah kama ka dunah zui lytah a pa tawtupaw a dunah ka zuinah cawtah a cang.

### *Zisu konglang reinah*

<sup>31</sup> Kama ka kong kama tah ka reilai caco, ka reipaw cawh zingchui be. <sup>32</sup> Kama ka kong a reipaw pakheh ung ka, ama tei ka kong a reipaw cawh zing a chui tah khah ka hni.

<sup>33</sup> Naaning tah Johan khakhei cawngsaw taw he ceh ka, ama taco biahmuisui khah a rei. <sup>34</sup> Mehnung tei ka kong aa reipaw cawh zetah sah bei neh. Canghrasala ma bia ka reipaw heh pachah naa cang khy ná pawtah a cang. <sup>35</sup> Johan cawh a khai ngeteipaw me-ing cang ka, naaning taco ama a khainah cawh caikheh tei anawngnah takhei naa du.

<sup>36</sup> Johan a reipaw navy tah a rungnaw vypaw khah kama cawh ka reipaw a cang. Zecawtamaw tatah atotei rai heh paling rua pawtah hei Paw tah pa pei ka, taico ma ka hre leimeipaw rai tahei kama cawh Paw tah a pa taw tahpaw khah a langсах. <sup>37</sup> Taico a pa tawtupaw Paw ceingei tah ka cangnah konglang cawh a langсах. Naaning taco a o thui bang be ca he ceh ka, a hmui zong hmuh bang bei he ceh. <sup>38</sup> A bia zong naaning letah a cing kai bei he ceh, zecawtamaw tatah a tawpaw khah naa zing lynah cawtah. <sup>39</sup> Khazing Capathai khah khiahle he ceh ka naa rei, zecawtamaw tatah ma sahlo taikhei chaizaw hringnah kaa hmuh khy a tah naa rawh cawtah a cang. Ma Capathai sahlo heh kama ka kong a langсах paw a cang he.

<sup>40</sup> Canghrasala hringnah hnui rua pawtah kama kha a vong cawh du hlui bei he ceh.

<sup>41</sup> Cawngsaw tei pachaw palaw cawh du bei neh, <sup>42</sup> canghrasala ka ca hni thlang he. Naa thinglung letah Khazing donah hnui bei he ceh tah cawh ka hni. <sup>43</sup> Kama cawh ka Paw a ming tah a vong neh ka, naaning tah pa cyhlang bei he ceh, canghrasala pakheh kheh cawh Ama a ming tah a vong tua my seh la, ama cawh naa cyhlang thlang a. <sup>44</sup> Pakheh le pakheh na reithainah pawhe ceh cawh a cyhlang he ceh ka, Khazing taitei a va chuhpaw reithainah zetah a rei lypaw naaning sahlo tahei zekhatamaw naa zing khy a?

<sup>45</sup> Canghrasala Paw hmekaw letah sua a ma phosá a tatah parawh khe o, naaning sua a ca pho sá paw he cawh na paichai pawhe ceh Moses khah a cang. <sup>46</sup> Moses naa zing caco, kama naa pa zing rua a cang, zecawtamaw tatah ama taco kama ka kong a ciapaw a cang. <sup>47</sup> Canghrasala a ciapaw naa zing lynah cawtah khei ka reipaw cawh zekhatamaw naa zing khy thai a?" tatah a tah.

## 6

*Zisu tah cawngsaw 5000 lawh a dang he*  
(Mt 14:13-21; Mk 6:30-44; Luk 9:10-17)

<sup>1</sup> Ma khy taico, Zisu cawh Galili rili (ma heh Tiberia rili a cang) ngaekang lang khah a vaw ka, <sup>2</sup> cawngsaw rungpui takhei Ama cawh aa zui, zecawtamaw tatah a sahpaw sahlo cung letei a tu-apaw ningang chuipaw paching pakhanah khah aa hmuh cawtah a cang. <sup>3</sup> Mataico Zisu cawh tlanglang ke ka, a hningzuitu sahlo khakhei a ty.

<sup>4</sup> Juda cawngsaw aa Khungsai Panawnah cawh a ne myca.

<sup>5</sup> Zisu cawh a hui ka, Ama lang cawngsaw rung-pui a vongpaw he khah a hmuh tihtah Filip hai leco, “Ma cawngsaw sahlo aa e rua tahei zeletamaw very kaa va caw a?” tatah a tah. <sup>6</sup> Ama hnehshah nápwatma ma bia heh a haepaw a cang, zecawtamaw tatah zemaw ka tua a tahpaw khah a lung letah a hni pacia thah.

<sup>7</sup> Filip taco a hai letah, “Pakheh tah sangkheh cy ting rua pawtah a zawpaw very cawh thlah reh nihlo tah a cawh khy tlung be!” tatah a chai.

<sup>8</sup> Ahringpaw a hningzuitu, Simon Piter a unypaw Andru taco, <sup>9</sup> “Ma lehei hrangsang very tlangpangaw le ngadih punghning a hnuipaw nyhehpaw a ung, canghrasala ma reiopaw cawngsaw hrong lehei zetlang maw a cang a?” tatah a tah.

<sup>10</sup> Zisu taco, “Cawngsaw khah a tysah tua o,” tatah a tah he. Ma hminghmaw cawh araang hrong tah cang ka, capaw puitling 5000 hrong a cangpaw he cawh a ty he. <sup>11</sup> Mataico Zisu tah very tlang sahlo cawh law ka, Khazing khatah lawngbia a hlai ka, a ty thlangpaw cawngsaw sahlo cawh aa dunah zé khei rai law a tah he. Ngaw zong cawh ma hraco a tua.

<sup>12</sup> Aa rivaw pawtah aa e thlu khy taitah a hningzuitu sahlo cawh, “Ebangpaw very sahlo pahmo la, thlaw thlang khe lo,” a tah he. <sup>13</sup> Ma sahlo tei aa ebangpaw very tlang pangaw taitei a hluipaw sahlo cawh pakhong he ka, baihraw hluihning a chih.

<sup>14</sup> Cawngsaw sahlo taco Zisu tei a tuapaw ningang chuipaw paching pakhanah khah aa



hmuh tihtah, “Ma paw heh khazaw letah a vongpaw Khazing khuavang a cang hrahing,” tatah aa tah. <sup>15</sup> Ma sahlo tahei a vong he ka, hranghrang tah siangpahrang tah aa pa tua a tahpaw khah a hninah cawtah tlanglang khah aparuh teitah a seihly kaw.

*Zisu tui cung letah a sei*  
(Mt 14:22-27; Mk 6:45-52)

<sup>16</sup> Zailang a va phah tihtah a hningzuitu sahlo cawh Galili tuiping lang khah cung thlah he ka, <sup>17</sup> tuilawng chunglang cawh a nae he ka, Kaper-naum khua lang sei rua pawtah khei tuiping cawh aa cakah. Khua cawh mui ca ka, Zisu cawh aaning sahlo khah a hlawng balang bei he. <sup>18</sup> Thli a rupaw pui a hrang ka, tuileh cawh a cahrah ngetei. <sup>19</sup> Khangthung a cang ly leh khangpali hrawng tuilawng cawh aa zeitaitah tui cung letah Zisu va sei katei, tuilawng a va pangepaw khah hmuh he ka, aa ci a tho. <sup>20</sup> Canghrasala Zisu taco aa hai letah, “Kama ka cang hi, ci khe o,” tatah a tah he. <sup>21</sup> Mataico tuilawng chunglang cawh a naesah he ka, ma cangkawleh cawh tuilawng cawh aa tingnahmaw ngaekang khah a va phah.

<sup>22</sup> Ningthlamongpaw cawh a hningzuitu sahlo aa ungnahpaw dihdong tuiping raechai ngaekang letei a ungpaw zawpui sahlo tah ma lekhei a hningzuitu sahlo aa kepaw tuilawng sangkheh suitei ung ka, Zisu cawh a hningzuitu sahlo khakhei tuilawng chunglang a nae be, aaning teitah aa seihly tahpaw khah aa hni. <sup>23</sup> Mataico, Tiberia khuapui taitah a va chuhpaw tuilawng sahlo cawh cawngsaw rung-pui tah Abuipaw tei lawngbia a hlai khy

taitah very aa enah hminghmaw lekhei aa chung he. <sup>24</sup> Ma hminghmaw leco Zisu le a hningzuitu sahlo ung bei he tahpaw khah zawpuipaw tah aa hni tihtah tuilawng cawh ke he ka, Zisu hui rua pawtah khei Kapernaum khua lang cawh aa sei.

*Zisu cawh hringnah very a cang*

<sup>25</sup> Tuiping raechai lang lekhei aa va hmuh tihtah a hai leco, “Cawngpahtu, zening tamaw ma lang heh na va sei?” tatah aa hae.

<sup>26</sup> Zisu taco, “Biahmuisui ka ca ching he, Kama naa pa hui lai leimeipaw heh ningang chuipaw paching pakhanah naa hmuh cawtah cang lytah naa ri vaw ky tah very tlang sahlo khah naa e rawng tah a cang. <sup>27</sup> A lyde khypaw ding le e caw suipaw tah rai hre khe o, chaizaw hringnah khatei a peitlepaw batui, Cawngsaw Sawcapaw tei a ca pehpaw he cawtah khei naa hre hri be. Ama cawh Paw Khazing tah a nawtlahnah ca a khai ciapaw a cang!” tatah a chai he.

<sup>28</sup> Mataico Zisu cawh, “Khazing a dupaw rai kaa hre khy nápawtah zemaw kaa tua ruapaw a cang?” tatah aa hae.

<sup>29</sup> Zisu taco, “Khazing rai cawh ma heh a cang hi, Ama tei a za tawpaw zing khah a cang,” tatah a chai he.

<sup>30</sup> Macawtaco Zisu cawh, “Hmuh a tei kaa ca zing nápawtah ze ningang chuipaw paching pakhanah maw na ma pae a? Zemaw na tua a? <sup>31</sup> ‘Aaning sahlo aa e ruapaw takhei very khah avai taitah a thlah he,’<sup>✧</sup> tatah ciapaw hratah kaa

✧ **6:31** Piachua 16:4; Neh 9:15; Hlaw 78:24-25

mapaw sahlo taco raangca lekhei manna very khah aa e tatah,” tatah aa tah.

<sup>32</sup> Zisu taco aa hai letah, “Biahmuisui ka ca ching he, vaicung taitei very a thlah pahpaw he khah Moses cang be, vaicung taitah very hmuisuipaw a ca thlah pawhe cawh ka Paw a cang hri.

<sup>33</sup> Zecawtamaw tatah Khazing very cawh vaicung taitah za cung katei, khazaw caw tei hringnah a peipaw cawngsawpaw heh a cang,” tatah a tah he.

<sup>34</sup> Aaning sahlo taco, “Abuipaw, ma very cawh atohei co ma pei tei my lo,” tatah aa tah.

<sup>35</sup> Mataico Zisu tah, “Kama heh hringnah very cawh ka cang hi. Kama khatei a vongpaw cawngsaw cawh a ngaidi by be, taico kama a pa zingpaw cawngsaw cawh zening tahmai a tui hrae by be.

<sup>36</sup> Canghrasala ka rei siapaw hratah, naa pa hmuh thlang naná teitah pa zing hlui bei he ceh. <sup>37</sup> Paw

tei a pa pehpaw vytei sahlo cawh kama khatah a vong he ka, kama khatah a vongpaw maikaw cawh ahohmai daichua bei neh. <sup>38</sup> Zecawtamaw

tatah kama ka dunah tua rua pawtah vaicung taitah za cung be ca neh ka, a pa tawpaw a dunah

tua rua pawtah a cang hri. <sup>39</sup> Taico a pa tawpaw a dunah cawh kama a pa pehpaw vytei sahlo khah pakheh hmai hly lytah caichangnah ning letah tho sápw he khah a cang. <sup>40</sup> Zecawtamaw

tatah ka Paw a dunah cawh Sawcapaw khah hmuh katei, a zingpaw taco chaizaw hringnah hnui ka, caidongnah ning letah kama tah ka patho a,” tahpaw heh a cang.

<sup>41</sup> “Kama heh vaicung taitei a za cungpaw very cawh ka cang,” a tah cawtah Juda cawngsaw sahlo takhei a kong phingze hrang khah patho he ka,

<sup>42</sup> “Ma paw heh Zisu, Josef a sawcapaw khah cang bei maw, a no le a paw kaa hni thlangpaw he khah? Zecawtamaw, ‘Vaicung taitah ka za cung tatah a tah lalei?’ ” tatah aa tah.

<sup>43</sup> Zisu taco, “Naaning le naaning teitah phingze leimei khawh khe o. <sup>44</sup> A pa tawpaw Paw tah a va chui he tah ly co kama kha a vong khypaw ahohmai ung bei he, a vongpaw cawh caichangnah ning letah ka patho a. <sup>45</sup> Khazing khuavang sahlo cabu letah, ‘Aaning vytei cawh Khazing tah a cawngpah he a,’<sup>☆</sup> tatah ciapaw a cang. Paw bia nge katei a cawngpaw maikaw he cawh kama kha a vong tae he a. <sup>46</sup> Khazing taitei a va chuhpaw seh tah ly co Paw a hmuhpaw ung bei he, Ama suitei heh Paw a hmuhpaw cawh a cang. <sup>47</sup> Biahmuisui ka ca ching he, ahohmai a zingpaw maikaw taco chaizaw hringnah a hnui thah. <sup>48</sup> Kama heh hringnah very cawh ka cang. <sup>49</sup> Naa mapaw sahlo taco raangcaa letah manna very khah e he ka, a thi thlang he. <sup>50</sup> Canghrasala vaicung taitah a za cungpaw very ung ka, ma a epaw cawngsaw cawh thi a bei he. <sup>51</sup> Kama heh vaicung taitei a za cungpaw hringnah very cawh ka cang. Cawngsaw ahotahmai ma very heh a e caco, ama cawh chaizaw tah a hring a. Ma very cawh khazaw hring ná pawtei ka paepaw ka ngaisaw heh a cang,” tatah a chai he.

<sup>52</sup> Mataico, “Ma cawngsaw tahei zekhatamaw kaa e ruapaw tah a ngaisaw cawh a ma peh thai a?” tatah Juda cawngsaw sahlo cawh lesahteitah a eichae he.

---

<sup>☆</sup> **6:45** Isai 54:13

<sup>53</sup> Zisu taco aa hai letah, “Biahmuisui ka ca ching he, Cawngsaw Sawcapaw a ngaisaw naa e ly le a thisai naa ding ly caco, hringnah hnui bei ceh. <sup>54</sup> Ka ngaisaw e katei, ka thisai a dingpaw taco chaizaw hringnah hnui a ka, caichangnah ning letah ka patho a. <sup>55</sup> Zecawtamaw tatah ka ngaisaw cawh batui hmuisui cang ka, ka thisai cawh ding hmuisui ruapaw a cang. <sup>56</sup> Ka ngaisaw e katei, ka thisai a dingpaw cawh kama letah ung ka, ama letah kama zong ka ung hrah. <sup>57</sup> A hring thlangpaw Paw tah pa taw ka, Paw thongtah ka hringpaw hratah Ka ngaisaw e katei ka thisai a dingpaw cawh kama ka thongtah ama zong a hring a. <sup>58</sup> Ma heh vaicung taitei a za cungpaw very cawh a cang. Kaa mapaw sahlo cawh manna very khah e he ka, a thi he, canghrasala ma very a epaw heh cawh chaizaw tah a hring a,” tatah a tah. <sup>59</sup> Ma bia heh Kapernaum khua synagog\* letah a cawngpah ning he tah a reipaw a cang.

*Zisu cawh a hningzuitu hlupui tah aa piasai*

<sup>60</sup> Ma bia cawh aa thui tihtah a hningzuitu mehlupui takhei, “A cawngpahnah a ru ngetei. Ahomaw a cyhlang khy a?” tatah aa tah.

<sup>61</sup> Ma kong a reipaw rawng tei a hningzuitu sahlo aa phingzepaw khah Zisu tah hnih ka, aa hai leco, “Ma bia takhei naa lung ca cangsah bei he i? <sup>62</sup> Cawngsaw Sawcapaw heh a ungnah tawpaw lang a ke kawpaw khah hmuh my la, zekhatamaw naa ta a! <sup>63</sup> Hringnah a peipaw cawh Thlawpaw heh a cang, ngaisawpaw cawh zehmai cang be.

---

\* **6:59** Synagog cawh, Juda sahlo behnah ing,a cang.

Naaning khatei ka reipaw bia sahlo heh thlawpaw cawh cang ka, hringnah a cang he. <sup>64</sup> Canghrasala, naaning thaikhehpaw sahlo taco zing bei he ceh,” tatah a tah he. Zecawtamaw tatah ahomaw a zing lypaw tahpaw le ahomaw a pa luithae a tahpaw khah a thoning taitah Zisu tah a hni thah cawtah a cang. <sup>65</sup> A bia reipaw cawh pazo ka, “Ma cawtah hei Paw tah a baw ly caco he kama kha a vong khypaw ung bei he tatah ka tahpaw khah a cang,” tatah a tah.

<sup>66</sup> Ma khy cangkaw leco, a hningzuitu mehlupui khah a paleh kaw he ka, Ama khah zui khawh bei he.

<sup>67</sup> Macawtaco Zisu tah a hningzuitu pahrawh-luihning sahlo khah, “Naaning saw, sei hly cawh naa du hrah maw, du hrah ly?” tatah a hae he.

<sup>68</sup> Simon Piter tah, “Abuipaw, aho kha maw kaa sei a? Chaizaw hringnah bia a hnuipaw cawh nama na cang. <sup>69</sup> Nama cawh Khazing a Mehpathai na cang tahpaw hnih peh ka, kaa zing myca,” tatah a chai.

<sup>70</sup> Mataico Zisu tah, “Naaning hluihningpaw heh kama tah ka ca thingpaw cang bei he ceh maw? Canghrasala naaning hrong lehei pakheh cawh khachia a cang!” tatah a palei. <sup>71</sup> Ma cawh hluihning letei reipaipaw, a hning tah Ama a luithepaw Simon Iskariot a sawcapaw Judas Iskariot khah a tah hngangpaw a cang.

## 7

### *Thlangda Panawnah lang Zisu a sei*

<sup>1</sup> Ma khy taico Zisu cawh Galili pai chung khah a tlawng lai, Judia raang taitah a nocareipaw a

cang, zecawtamaw tatah Juda cawngsaw sahlo takhei kaa thaw a tatah aa tah. <sup>2</sup> Canghrasala Juda cawngsaw sahlo Thlangda Panaw khah a ne tihtah, <sup>3</sup> a uny sahlo takhei Zisu cawh, “Na hningzuitu sahlo tah ningang chuipaw na tuapaw sahlo khah hmuh na he seh tatah ma taihei piathlah la, Judia raang lang na sei be. <sup>4</sup> Cawngsaw tah pa hnih he seh tah a dupaw taco aparuh teitah zehmai tua bang bei he. Ma hming sahlo na tuapaw hei khazaw cawh a hnisah ca,” tatah aa tah. <sup>5</sup> Zecawtamaw tatah a chuahrui uny sahlo takhei hmai tah Ama cawh zing bei he.

<sup>6</sup> Macawtaco Zisu tah aaning sahlo cawh, “Ka cawtah cai rawhpaw tlung balang be; naaning naa caw taco ze cai hmai heh a rai cang thlang. <sup>7</sup> Khazaw tahei naaning cawh a ca hua bei he, canghrasala kama cawh a pa hua, zecawtamaw tatah a tuapaw khah hmingchahly a cang tatah ka tah cawtah a cang. <sup>8</sup> Panawnah lang cawh va sei la, kama cawh va sei balang bei neh, zecawtamaw tatah ka cawtah cai tlung balang be,” tatah a ching he. <sup>9</sup> Ma bia a rei khy taico, Galili pai chung lekhei a ung thlang.

<sup>10</sup> Canghrasala a uny sahlo cawh Panawnah zo pawtah aa seithlah khy taikhei Ama zong cawh langhai tah cang lytah aparuh teitah a sei hrah. <sup>11</sup> Panawnah leco Juda cawngsaw sahlo takhei hui he ka, “Ma cawngsawpaw khah zeletamaw a ung?” tatah aa hae lai he.

<sup>12</sup> Zawpuipaw taco a konglang cawh a cekanawh tlungmang he. Thaikhewpaw tah, “Mehchaw a cang,” tatah aa tah.

Ahringpaw tah, “Cang be, cawngsaw a dungkhei laipaw a cang,” tatah aa palei he. <sup>13</sup> Canghrasala Juda cawngsaw khah aa cinah caw he tah ahotahmai a kong khah langhai tah zehmai rei bei he.

*Zisu tah Panawnah leco a cawngpah he*

<sup>14</sup> Panawnah cawh a cing chy tluh aa pachang hrawnghrang lekhei Zisu cawh behnah ingdung chunglang khah va sei ka, a cawngpah he. <sup>15</sup> Juda cawngsaw sahlo cawh aa khuarawh haa ka, “Ma cawngsawpaw tahei cawngnah hnui lytah zekhatamaw ma hrahei a hni thlang?” tatah aa tah.

<sup>16</sup> Zisu taco, “Ka cawngpahnah heh kama taiteipaw cang be. A pa taw tupaw taitei a va chuhpaw a cang. <sup>17</sup> Khazing dunah tua a pachiapaw cawngsaw taco ka cawngpahnah heh Khazing taitei a va chuhpaw maw a cang, a cang ly leh kama taiteipaw maw a cang tah cawh a hni thlang a. <sup>18</sup> Ama dunah hratah male a cawngpahpaw cawh ama ming chahnah a huipaw a cang. Canghrasala ama a taw tupaw ming chah napaw caw tei a hrepaw cawngsaw cawh zingchuihaw cawngsaw a cang; a chung letah hinghenah hnui be. <sup>19</sup> Phungbia khah Moses tah ca pei bei he maw? Pakkeh tahmai tah naa zui tlung be. Zecawtamaw thaw na pa pachia he ceh?” tatah a tah he.

<sup>20</sup> Cawngsaw zawpui taco, “Nama cawh khachia tah a pahrangpaw na cang. Ahomaw thaw a ca pachia?” tatah aa chai.

<sup>21</sup> Zisu taco aa hai letah, “Ningang chuihaw sangkheh ka tuapaw khah naa zongmingtei tah



naa khuarawh a haa. <sup>22</sup> Moses tah cingpatainah phung a ca peh caw he tah Sabat ning tahmai nyheh khah aa cingpa naa tai he kho. A ngetei tahpaw co, ma cawh Moses taitah a chuhpaw cang lytah naa pu naa paw sahlo taitah a chuhpaw a cang kho. <sup>23</sup> Moses phungbia khah ro tlung lytah nyheh khah Sabat ning tah aa cingpa naa tai he a cang caco, zecawtamaw Sabat ning tah cawngsaw pakheh ka dangsahnah rawng letah ka cung letah naa thing a ae? <sup>24</sup> A cungphai a langná tah biacepah khe la, a dingpaw teitah biace my lo,” tatah a tah he.

### *Zisu heh Khri cawh a cang maw?*

<sup>25</sup> Ma bia rawng taco Jerusalem khuapui letei a ungpaw cawngsaw thaikhehpaw sahlo tah, “Ma paw heh thaw a pachiapaw he khah cang bei maw? <sup>26</sup> Ma lehei a langhai tah bia rei ka, zekhatahmai aa tah tlung be. Nawhnuitu sahlo tahei Khri cawh ama heh a cang tahpaw hnih pase ta he maw? <sup>27</sup> Canghrasala kaaning sahlo taco ma cawngsawpaw heh zelang tah a va chuhpaw maw a cang tah hnih thlang tlung peh ka, canghrasala Khri a va chua tih taco zelang tamaw a va chua a tahpaw ahotahtahmai aa hni tlung be,” tatah aa tah.

<sup>28</sup> Mataico, Zisu cawh behnah ingdung chung letei a cawngpahnah pawhe leco a thangpui tah y ka, “A cang, pa hnih he ceh ka, zelang tah a va chuhpaw maw ka cang tahpaw zong naa hni. Kama ka rei tah ma lehei a vong bei neh, canghrasala a pa tawtupaw cawh ahmangpaw a cang. Naaning taco Ama cawh hnih bei he ceh,

<sup>29</sup> canghrasala kama taco Ama cawh ka hni, zecawtamaw tatah Kama cawh Ama taiteipaw cang neh ka, Ama tah a pa taw,” tatah a tah.

<sup>30</sup> Ma leco tle a pachia he, canghrasala ahotah- mai a cung letah aa kih thlah bei he, zecawtamaw tatah a cai khah tlung balang be. <sup>31</sup> Cawngsaw zawpui chung letei mehlupui takhei Ama cawh aa zing. “Khri a va chua tihtah ma cawngsawpaw navy hei ningang chuipaw paching pakhanah a hlu vy a tua hlui maw?” tatah aa tah.

<sup>32</sup> Cawngsaw zawpui tah ma hratei a kong aa reipatlaw tlungmangpaw khah Farasi sahlo tah aa thui. Mataico, tlangbui macang sahlo le Farasi sahlo takhei Zisu cawh tle pawtah behnah ing raevai sahlo khah aa taw he.

<sup>33</sup> Zisu taco, “Naaning khatah cai cuitei ung neh ka, mataico a pa tawtupaw khatah ka sei a. <sup>34</sup> Pa hui he ceh ka, pa hmuh a bei ceh; ka ungnahpaw lang zong va sei khy bei ceh,” tatah a tah.

<sup>35</sup> Juda cawngsaw sahlo cawh pakheh le pakheh khah, “Ma cawngsawpaw heh kaa hmuh khy ly nápawtah zelang maw sei a pachia? Grik cawngsaw sahlo hrong letei a kaipaza pawhe Juda cawngsaw aa ungnah lang sei ka maw, Grik cawngsaw sahlo a va cawngpah he a? <sup>36</sup> ‘Pa hui he ceh ka pa hmuh a bei ceh, ka ungnah lang zong va sei khy bei ceh,’ a tahpaw heh zemaw a rei du?” tatah aa tah tlungmang.

<sup>37</sup> Panawnah a changnah le a rungnaw caipaw ning leco Zisu cawh a daw ka, a thangpui tah, “A tui a hraepaw cawngsaw cawh Kama kha a vong seh la, va ding seh. <sup>38</sup> A pa zingpaw cawngsaw

cawh Capathai tei a reipaw hratah hringnah tu-ihnew a chung taitah a laichua a,” tatah a tah. <sup>39</sup> A reidupaw cawh Ama a zingpaw sahlo tei aa cy lepaw Thlawpaw khah a cang. Ma cai tai leco Zisu cawh parungnaw a cang balang ly cawtah Thlawpaw khah peh cang balang bei he.

<sup>40</sup> A bia aa thuinah cawtah khei cawngsaw thaikhehpaw sahlo tah, “Ma cawngsaw heh kaa haw thlangpaw Khazing khuavang a cang hrahing thlang,” tatah aa tah.

<sup>41</sup> Ahringpaw takhei, “Ama heh Khri cawh a cang,” tatah aa tah.

Ahringpaw vy taco, “Zekhatamaw Khri cawh Galili raang taitah a chua thai a? <sup>42</sup> Capathai tah Khri cawh David pathlah taitah le David a ungnahpaw khua, Bethlehem taitah a chua a tah bei maw?” tatah aa tah. <sup>43</sup> Taico Zisu rawng taco zawpui cawh a chaichy he. <sup>44</sup> Thaikhehpaw tah tle du he ka, canghrasala ahotahmai tah a cung letah aa kih thlah bei he.

### *Juda hruiu sahlo zing lynah*

<sup>45</sup> A changnah leco behnah ing raevai sahlo cawh tlangbui macang sahlo le Farasi sahlo khakhei a vaw kaw he ka, “Zecawtamaw naa va chuakhui be?” tatah aa hae he.

<sup>46</sup> Behnah ing raevai sahlo taco, “Ma cawngsawpaw tei a reipaw hrahei a reipaw ahohmai ung balang bei he,” tatah aa tah he.

<sup>47</sup> Farasi sahlo taco, “Naaning zong ca dungkhei thah hrah ta he maw?” tatah aa tah he. <sup>48</sup> “Hruiu sahlo le Farasi sahlo hrong letah ama a zingpaw a ung he maw? <sup>49</sup> Aa ung tlung be. Canghrasala, ma zawpuipaw tahei co phungbia zehmai aa hni

tlung be, macawtaco pui aa cung letah chiasahnah a tlung he,” tatah aa tah.

<sup>50</sup> Aa hrong letei cawngsaw pakheh Nikodema, zai tah Zisu khah a vawpaw takhei, <sup>51</sup> “Kaa phungbia tahei cawngsawpaw zemaw a tua tahpaw hlehleng taw lytah thaily a cangsa haw?” tatah a hae he.

<sup>52</sup> Aaning sahlo taco, “Nama zong Galili raang taiteipaw cang hrah ta ceh haw? Khazing bia letah mingtua, Khazing khuavang cawh Galili raang taitah chuh a be, tahpaw cawh na hmuh thlang a,” tatah aa palei.

<sup>53</sup> Mataico aa ing cacy khei a dih he.\*

## 8

### *Canuno a sua leimeining tah aa tle*

<sup>1</sup> Canghrasala Zisu cawh Oliv tlaang lang khah a sei. <sup>2</sup> Mongdi takhei behnah ingdung chunglang khah a nae kaw ka, zawpui cawh ama khatah a vong he ka, taico a ty ka, aaning cawh a cawngpah he. <sup>3</sup> Phungbia cawngpahtu sahlo le Farasi sahlo takhei capaw kha a phei leimeinah letah aa tlepaw canu pakheh khah aa va chuakhui. A hme leco a dawsah he ka, <sup>4</sup> Zisu hai leco, “Cawngpahtu, ma canuno heh capaw kha a phei leimeinah letah tlepaw a cang. <sup>5</sup> Phungbia leco Moses tah, ‘Ma hapaw canu cawh alung tah naa vaseh he a,’ tatah bia a ma peh. Nama saw zekhatamaw na rawh?” tatah aa tah. <sup>6</sup> Ma biahaenah heh, Ama sua aa pu khy nápawtah ahui hratah aa thlahkhaipaw a cang.

---

\* **7:53** Kih cia thaikheh leco Johan 7:53 taitah Johan 8:11 tai heh ung be.

Canghrasala, Zisu taco alui lang a bung ka, a ki-hdong tah alui leco ca a cia. <sup>7</sup> Bia cawh aa haechai leimei tihtah a ka y ka, aa hai leco, “Naaning hrong lehei a sua bang lypaw takhei ma canuno heh alung co va taw seh,” tatah a tah he. <sup>8</sup> Taico a khuh ka, alui leco ca cawh a cia kaw.

<sup>9</sup> Ma bia a thuipaw sahlo cawh a macang caipaw taitah a nyheh caipaw tai pakheh khy pakheh tah seihly thlu he ka, Zisu longtei khah aa patang si, canuno cawh ma leco a daw thlang hrah. <sup>10</sup> Zisu cawh a ka daw ka, canuno cawh, “Cawngsawno, zelang maw aa ung thlu? Ahotahmai thaily ca cangsah bei he maw?” tatah a hae.

<sup>11</sup> Canuno taco, “Cawngpahtu, ahotahmai tah thaily pa cangsah bei he,” tatah a tah. Mataico Zisu tah, “Kama zong tah sua ca phosah hrah bei neh. Va sei la, va sua khawh kheh lo,” tatah a tah.

### *Zisu a biareipaw a hmangnah*

<sup>12</sup> Zisu taco zawpui sahlo khakhei bia cawh a reikaw, “Kama cawh khazaw khainah ka cang. A pa zuipaw cawh a muinah letah sei by be, khainah tei a pehpaw hringnah khah a hnui hri a,” tatah a tah.

<sup>13</sup> Farasi sahlo taco, “Nama tah nama na kong lilaw na rei hi. Macawtaco na reipaw heh zehmai cang be,” tatah aa tah.

<sup>14</sup> Zisu taco, “Kama teitah ka cangnah ka rei tahmai tah ka reipaw cawh ahmangpaw a cang, zecawtamaw tatah kama taco zelang tamaw va chuh neh ka, zelang maw ka sei a, tahpaw ka hni. Canghrasala naaning taco zelang tamaw va chuh neh ka, zelang maw ka sei a, takhah hnih

bei ceh. <sup>15</sup> Naaning taco mehnung phung tah bia naa ce tei; Kama cawh ahohmai biacepah bei neh. <sup>16</sup> Canghrasala bia ka cepah he tahmai tah ka cepahnah cawh ahmang a, zecawtamaw tatah Kama teitah cang bei neh. A pa tawtupaw Paw khatah ka daw peh. <sup>17</sup> Naaning naa phung-bia letah mehnung pahning tah biaparua tei aa reipaw cawh a hmang tatah a cia hrah bei maw! <sup>18</sup> Kama cawh Kama teitah ka cangnah a reipaw ka cang; a pa hnikhuitu ahringpaw cawh a pa tawtupaw, Paw khah a cang,” tatah a tah he.

<sup>19</sup> Mataico Zisu cawh, “Na paw cawh zeletamaw a ung?” tatah aa hae.

Zisu taco, “Naaning cawh kama zong pa hnih bei ceh, ka Paw zong hnih bei ceh. Kama naa pa hni caco, ka Paw zong naa hni thlang hrá a,” tatah a palei he. <sup>20</sup> Ma bia heh behnah ing chung tholong aa chianahpaw kae letei a cawngpah ning he tah a reipaw a cang. Ahotahmai tle hrah bei he, zecawtamaw tatah a cai a tlung balang lynah cawtah a cang.

<sup>21</sup> Aa hai letah Zisu tei a rei vypaw cawh, “Kama cawh sei neh ka, pa hui he ceh ka, naa suannah letah na thi he ceh. Ka seinahpaw lang zong a vong khy bei ceh,” a tah he.

<sup>22</sup> Macawtaco Juda cawngsaw sahlo tah, “Ka seinahpaw lang va sei khy bei ceh a tahpaw heh, ‘Kama le kama ka thae a,’ a tah dunah maw a cang a?” tatah aa tah.

<sup>23</sup> Canghrasala aa hai leco, “Naaning sahlo cawh a rai lang taiteipaw na cang he ceh. Kama cawh cung lang taiteipaw ka cang. Naaning cawh khazaw leteipaw cang he ceh ka, Kama cawh

khazaw leteipaw cang bei neh. <sup>24</sup> Naa suanah letah na thi he ceh tatah ka ca ching thah he; Kama cawh ka reipaw ama khah ka cang ka tahpaw naa zing ly caco, naa suanah letah na thi hrahing thlang he ceh,” tatah a tah vy.

<sup>25</sup> Aaning sahlo taco, “Ahomaw na cang?” tatah aa hae.

Zisu taco, “Athoning taitah pui ka ca ching thah he kha,” tatah a palei he. <sup>26</sup> “Naaning naa kong letah bia rei ruapaw a hlupui ka hnu. Canghrasala a pa tawtupaw cawh a paichai tlang cang ka, ama taitei ka thui paw khah khazaw heh ka chingpaw a cang,” tatah a tah he.

<sup>27</sup> Aaning sahlo taco, a Paw kong a ma ching tahpaw khah thui thai bei he. <sup>28</sup> Macawtaco Zisu tah, “Cawngsaw Sawcapaw naa calia tih taco ahomaw ka cang tahpaw le, kama ka rei tah zehmai ka tua lypaw le, Paw tei a pa cawngpahpaw khah ka rei takhah naa hni tae a. <sup>29</sup> A pa tawtupaw cawh Kama khatah a ung. Kama long teitah pa seisai be, zecawtamaw tatah Ama a lung a lawng nápaw khah ka tuateinah cawtah a cang,” tatah a tah. <sup>30</sup> A reipaw bia a thui paw mehlupui tah Ama khah aa zing.

### *Abraham sawtei sahlo*

<sup>31</sup> Zisu tah Ama a zingpaw Juda cawngsaw sahlo hai letah, “Ka cawngpahnah letah naa ung paria thlang caco, ka hningzuitu hmuisui na cang he ceh. <sup>32</sup> Mataico biahmuisui hnih a he ceh ka, ma biahmuisui taco a ca lua sá he a,” tatah a tah he.

<sup>33</sup> Aaning sahlo taco, “Kaaning cawh Abraham pathlah cang peh ka, aho sae hmai cang bang bei

peh, zecawtamaw luasah na cang he ceh, tatah na ma tah?" tatah aa chai.

<sup>34</sup> Zisu taco, "Biahmuisui ka ca ching he, a sua-paw maikaw cawh suannah sae a cang he. <sup>35</sup> Sae cawh ingchungkho letah reipai ruapaw cang be, canghrasala Sawcapaw cawh chaizaw cawtah ingchungkho letah a ungpaw a cang. <sup>36</sup> Macawtaco Sawcapaw tah a ca luasah caco he, na lua hmuisui he ceh. <sup>37</sup> Abraham pathlah na cang he ceh tah cawh ka hni. Canghrasala Kama cawh thaw na pa pachia he ceh, zecawtamaw tatah ka bia tah naa chung letah hminghmaw hnui be. <sup>38</sup> Paw a hmekaw letei ka hmuhpaw khah ca ching he neh ka, canghrasala naa paw taitei naa thui-paw khah naa tua laky thlang," tatah a palei he.

<sup>39</sup> Aaning sahlo taco, "Abraham cawh a ma path-lahtu a cang," tatah aa chai.

Zisu taco, "Abraham pathlah naa cang caco, Abraham a tuapaw khah pui naa tua caw! <sup>40</sup> Khazing taitei ka thui-paw biahmuisui a ca chingpaw he Kama heh thaw na pa pachia he ceh. Abraham taco ma hapaw cawh a tua bang tlung be. <sup>41</sup> Naaning sahlo cawh naa paw tei a tuapaw hming sahlo khah naa tua leimei thlang tei," tatah a tah he.

Aaning sahlo taco, "Kaaning cawh zisaw kaa cang tlung be. Paw ka hnuipaw cawh Khazing suipaw a cang," tatah aa tah.

*Khachia sawtei sahlo*

<sup>42</sup> Zisu taco aa hai letah, "Khazing khah naa Paw a cang caco, naa pa do ruapaw a cang, zecawtamaw tatah Khazing taitah a vong neh ka, atoheh ma lehei ka ungpaw a cang. Kama ka



rei tah a vong bei neh. Ama tah a pa tawpaw a cang hri. <sup>43</sup> Zecawtamaw ka biareipaw heh naa hni pase thai be? Zecawtamaw tatah ka reipaw naa thui thaily navai tah a cang. <sup>44</sup> Naaning cawh Setan khah naa paw cang ka, naa paw a dupaw khah tua lai naa du. Ama cawh athoning taitah lenongpaw cang ka, biahmuisui khah a tle be, zecawtamaw tatah ama letah biahmuisui a ung lynah cawtah a cang. A hing tihtah ama a chuakhuipaw khah a reipaw a cang thlang, zecawtamaw tatah ama cawh mehing le hingnah paw a cang. <sup>45</sup> Biahmuisui ka rei thlang naná teitah pa zing bei he ceh hi! <sup>46</sup> Suanah a tua tatah a pa tah khypaw na ung he ceh maw? Biahmuisui ka ca ching tei he a cang caco, zecawtamaw naa pa zing be? <sup>47</sup> Khazing tei a cangpaw cawngsaw taco Khazing rei khah a nge. Khazing a rei naa nge lynah chang cawh Khazing tei naa cang lynah cawtah a cang hi,” tatah a tah he.

### *Zisu tah a cangnah kong a reinah*

<sup>48</sup> Juda cawngsaw sahlo taco, “Nama cawh Samaria cawngsaw cang ceh ka, na chung letah khachia a hrei kaa ca tahpaw khah ahmang thlang bei maw?” tatah aa chai.

<sup>49</sup> Zisu taco, “Ka chung letah khachia a hrei be, ka Paw khah cizaw neh ka, canghrasala naaning taco pa cizaw bei ceh. <sup>50</sup> Kama cawh Kama ka rungnawnah a huipaw cang bei neh; canghrasala a pa huipahtu pakheh ung ka, Ama cawh biacetu a cang. <sup>51</sup> Biahmuisui ka ca ching he, ka bia a zuipaw cawngsaw cawh thi hrahing a be,” tatah a tah.

<sup>52</sup> Juda cawngsaw sahlo takhei, “Na chung letah khachia a hrei hrahing thlang tahpaw atoheh a se pawtah kaa hni myca. Abraham cawh thi ka, ma hraco Khazing khuavang sahlo zong a thi hrah he, canghrasala nama taco ka bia a zuipaw cawngsaw cawh thihnah pateh hrahing a be, tatah na tah. <sup>53</sup> Nama cawh kaa mapaw Abraham navy tah na lai vy maw? Ama cawh thi ka, ma hraco Khazing khuavang sahlo zong a thi hrah he. Aho tamaw na rei?” tatah aa tah.

<sup>54</sup> Zisu taco, “Kama le kama ka parungnaw caco, ka parungnawnah cawh zehmai cang be. Kaa Khazing naa tahpaw ka Paw heh a pa cuicaling tu cawh a cang. <sup>55</sup> Ama cawh naa hni ly tahmai tah Kama taco Ama cawh ka hni. Hnih bei neh ka tah caco, naaning hratah mehing ka cang hrá a, canghrasala Ama cawh hnih neh ka, a bia khah ka zui. <sup>56</sup> Naa mapaw Abraham cawh ka va chua nápwaw ning hmuh ruapaw heh a ngete be ca ka, ka ning cawh hmuh ka, a lawng ngetei,” tatah a palei he.

<sup>57</sup> Juda cawngsaw sahlo taco Zisu cawh, “Nama cawh kung songngaw hmai na tah balang tung be, Abraham cawh na hmuh thah tah law!” tatah aa tah.

<sup>58</sup> Zisu taco, “Biahmuisui ka ca ching he, Abraham a pi hlai tah a ung thahpaw ka cang!” tatah a chai he. <sup>59</sup> Ma tih taco Ama va nápwawtah alung cawh haw he ka, canghrasala Zisu cawh behnah ingdung chung taikhei piathlah ka, a nawh.

## 9

*Zisu tah a no chungpi tei a mehcopaw a dangsah*

<sup>1</sup> Lang letah a seipai khei a no chungpi taitei a mehcopaw cawngsaw pakheh khah a hmuh. <sup>2</sup> A hningzuitu sahlo taco Zisu cawh, “Cawngpahtu, a no chungpi tei a mehcopaw cawngsawpaw heh ama a suanah rawng tamaw a cang, a cang ly leh a no le paw aa suanah rawng tah?” tatah aa hae.

<sup>3</sup> Zisu taco, “Ama a suanah rawng tah cang be, a no le paw aa suanah rawng tah zong cang be, ma hrarei a cangpaw heh a hringnah letah Khazing rai a langsung nápaw cawtah a cang hri. <sup>4</sup> A pa tawtupaw a rai heh ching cai a cang chung lehei kaa hre a. Ahohmai aa hre khy ly nápaw zai cai a va chuh a. <sup>5</sup> Kama heh khazaw letah ka ungchung tahei co, khazaw khainah ka cang,” tatah a tah.

<sup>6</sup> Ma bia a rei khy taico alui letah a ci chawh ka, a ci co alui cawh nawng ka, cawngsawpaw a mehkho leco a hne pah. <sup>7</sup> “Va sei la, Siloam tuiping letah a va si, (Siloam a silang cawh Taw tahnah a cang),” tatah a tah. Macawtaco cawngsawpaw cawh sei ka, a va si ka, khua cawh hmuh kaw ka, ing lang a dih.

<sup>8</sup> A ingpaw sahlo le kih dopaw a cangpaw a hmuh teipaw cawngsaw sahlo takhei, “Ma cawngsawpaw heh a ty hmo tei kih a do teipaw khah cang thlang bei maw?” tatah aa tah. <sup>9</sup> Thaikhewpaw cawngsaw sahlo taco, “Ama khah a cang thlang,” aa tah.

Ahringpaw sahlo taco, “Cang be, ma cawngsawpaw khah a lo bia a cang,” tatah aa tah.

Canghrasala ama teitah, “Ma cawngsawpaw khah ka cang,” tatah a tah.

<sup>10</sup> A cang caco, “Zekhatah zia tamaw na meh cawh khua a hmuh khy?” tatah aa hae.

<sup>11</sup> Ma cawngsawpaw taco, “Zisu aa tahpaw cawngsawpaw takhei alui nawng ka, ka meh letah a pa hne. Taico va sei la Siloam tuiping letah a va si tatah a pa tah. Macawtaco sei neh ka, a va si neh ka, mataico khua ka hmuh khy,” tatah a palei he.

<sup>12</sup> Aaning sahlo taco, “Ma cawngsawpaw cawh zeletamaw a ung?” tatah aa hae.

“Hnih bei neh,” tatah a tah he.

*A dangsahnah kong khah Farasi sahlo tah aa haecakhia*

<sup>13</sup> Aaning sahlo taco a meh a za copaw cawngsawpaw khah Farasi sahlo khakhei aa va chuakhui. <sup>14</sup> Zisu tah alui nawng katei, cawngsawpaw a meh khua a hmuhsah kawnah ning khah Sabat ning a cang. <sup>15</sup> Macawtaco zekhatah zia tamaw khua a hmuh khy kaw tahpaw khah Farasi sahlo zong taco aa hae. Ma cawngsawpaw taco, “Ka meh letah catlawh pa hne ka, a si neh ka, atohch khua ka hmuh khypaw a cang,” tatah a palei he.

<sup>16</sup> Farasi thaikhehpaw sahlo taco, “Ma cawngsawpaw cawh Khazing taiteipaw cang be, zecawtamaw tatah Sabat ning hmai a zaa lypaw,” tatah aa tah.

Canghrasala, ahringpaw sahlo takhei, “Mehsua taco ma hapaw ningang chuipaw paching pakhanah cawh zekhatamaw a tua khy a?” tatah tah he ka, macawtaco a chaichy he.

<sup>17</sup> A hning taco, mehcopaw lang cawh a hui kaw he ka, “Ama a kong rei ruapaw na hnuipaw a ung maw? Na meh cawh ama tah khua ca hmuhsah tlung ka,” tatah aa tah.

Ma cawngsawpaw taco, “Khazing khuavang a cang,” tatah a palei he.

<sup>18</sup> Ma cawngsawpaw cawh athoning tah a meh za co katei, ato letah khua a hmuhpaw khah Juda cawngsaw sahlo taco zing be ca he ka, macawtaco cawngsawpaw a no le a paw cawh aa va ysah he. <sup>19</sup> “Ma cawngsawpaw heh a no chungpi tah a meh a co naa tahpaw naa sawcapaw cawh a cang maw? Atoheh zekhatah zia tamaw khua a hmuh khy kaw thai?” tatah aa hae he.

<sup>20</sup> A no le paw taco, “A hmang, kaa sawcapaw a cang. A no chungpi tah a mehcopaw a cang.

<sup>21</sup> Canghrasala atoheh zekhatah zia tamaw khua a hmuh khy, aho tamaw a meh cawh khua a hmuhsah tahpaw cawh hnih bei peh. Ama khah hae thlang o. A kungkhua a zawpaw a cang myca; Ama tah ca chai thlang he seh,” tatah aa chai he.

<sup>22</sup> A no le paw tah ma bia aa reipaw heh Juda cawngsaw sahlo khah aa cinah caw he tah a cang, zecawtamaw tatah aaning sahlo takhei Zisu cawh Khri a cang tatah a tahpaw maikaw cawh synagog taitah papia a cang he a tatah bia aa thlia thah cawtah a cang. <sup>23</sup> Ma rawng tahei, “A kungkhua a zaw capaw a cang, ama khah hae thlang o,” tatah a no le a paw tah aa tahpaw khah a cang.

<sup>24</sup> Aaning sahlo taco a meh a za copaw cawngsawpaw cawh a uihningnah aa va ysah kaw he. “Khazing tukhah reithai, ma cawngsawpaw heh mehsua a cang tah kaa hni,” tatah aa tah.

<sup>25</sup> A meh a za copaw cawngsawpaw taco, “Mehsua a cang le cang ly kama hnih bei neh. Kama cawh mehco cang neh ka, canghrasala ato-

heh cawh khua ka hmuh myca tah long heh ka hni,” tatah a palei he.

<sup>26</sup> Taico ma cawngsawpaw cawh, “Nama khatah zehming maw a tua? Zekhatamaw na meh cawh khua a hmuhsah?” tatah aa hae.

<sup>27</sup> Ma cawngsawpaw taco, “Ka ca ching thah thlang he ceh saw, naa nge du tlung be. Zecawtamaw naa pa hae hry kaw leimei? A hningzuitu cang maw naa du hrah?” tatah a chai he.

<sup>28</sup> Mataico aa sawsaw tah ma cawngsawpaw cawh, “Nama khah ma cawngsawpaw a hningzuitu khah na cang kho! Kaaning cawh Moses hningzuitu ka cang peh hi! <sup>29</sup> Khazing cawh Moses kha bia a rei tei tahpaw kaa hni, canghrasala ma cawngsawpaw kong lehei co, zelang tamaw a va chua tahpaw hmai hnih bei peh,” tatah aa tah.

<sup>30</sup> Cawngsawpaw taco, “Ka meh cawh khua a pa hmuhsah thlang ceh samaw, zelang tamaw a va chua tah naa hni lypaw cawh khuarawha a chui caimang. <sup>31</sup> Khazing taco mehsua sahlo aa bia cawh nge be. Khazing zing ka, a dunah a tuapaw cawngsaw aa bia khah a nge tah cawh kaa hni. <sup>32</sup> A no chungpi tah a meh a copaw khua a hmuhsah he aa tahpaw ahohmai thui bang bei peh. <sup>33</sup> Ma cawngsawpaw heh Khazing taiteipaw a cang ly caco, zehming hmai tua khy a be!” tatah a chai he.

<sup>34</sup> Aaning sahlo taco, “Nama na pinah taitei suaná tah a chihpaw tahei maw kaaning cawh cawngpah na ma pachia hrah!” tatah aa palei. Taico aa tingchua.

*Thlawpaw mehconah*

<sup>35</sup> Aa papia hly tahpaw khah Zisu tah thui ka, a tong tihtah a hai leco, “Cawngsaw Sawcapaw heh na zing maw?” tatah a tah.

<sup>36</sup> Ma cawngsawpaw taco, “Cawngpahtu, ama cawh ahomaw a cang? Ka zing khy nápwatáh pa ching theh law,” tatah a hae.

<sup>37</sup> Zisu taco, “Ama cawh na hmuh thaipaw; atoheh nama khatei bia a rei leimeipaw cawngsawpaw heh a cang hi,” tatah a tah.

<sup>38</sup> Mataico cawngsawpaw taco, “Abuipaw ka zing,” tah ka, a beh.

<sup>39</sup> Zisu taco, “Mehco tah khua aa hmuh khy nápwatáh le khua a hmuhpaw cawh mehco aa cang nápwatáh khazaw lehei biace pawtah ka va chua,” tatah a tah.

<sup>40</sup> Ama khatei a ungpaw he Farasi thaikhehpaw sahlo tah ma bia cawh aa thui tihtah, “Kaning zong aa meh a co na ma tah dunah a cang maw?” tatah aa hae.

<sup>41</sup> Zisu taco, “Naa meh cawh co seh la, thaily na cang lypaw he ceh, canghrasala kaa meh khua a hmuh naa tah caw tahei thaily naa cang ning thlang he ceh.

## 10

### *Tuukingtu le a tuurung*

<sup>1</sup> Biahmuisui ka ca ching he, tuu a ki chunglang a naenah ingkaw lang tah a nae ly tei ahringpaw lang tah a kepaw cawngsaw cawh mehru le damia a cang. <sup>2</sup> A naenah ingkaw lang tei a naepaw cawh a tuurung a kingpaw cawngsaw a cang. <sup>3</sup> A kingtu cawngsaw takhei a kha cawh hong pah a ka, tuu sahlo taco a o khah aa nge a. A tuu sahlo khah

aa ming tah y he ka, khungthing lang a piakhui he a. <sup>4</sup> A tuu sahlo khah a papia thlu tih he tah ama tah langhmesah pá he ka, a tuu sahlo taco aa zui a, zecawtamaw tatah a o khah aa binah cawtah a cang. <sup>5</sup> Canghrasala ming hringpaw khah cawh zui by bei he, ma cawngsaw khah cawh aa saisai hrahing a, zecawtamaw tatah a o khah aa bi lynah rawng tah,” tatah a tah. <sup>6</sup> Zisu tah a biareinah letah ma tawchingnah bia heh a hmang tihtah aaning sahlo taco zemaw a ma ching tahpaw khah thuithai bei he.

<sup>7</sup> Macawtaco Zisu tah, “Biahmuisui ka ca ching he, Kama heh tuu a naenah ingkaw cawh ka cang. <sup>8</sup> Kama hlai tei a va chuhpaw vytei cawh mehru le damia a cang he, canghrasala tuu takhei aaning sahlo aa rei cawh nge bei he. <sup>9</sup> Kama heh a naenah ingkaw cawh ka cang. Kama lang tei a naepaw maikaw cawh pachah a cang he a. A nae a, piahly a, tah a ka, lawh zong a hmuh a. <sup>10</sup> Mehru cawh ruh du tah le thaw du tah le rorang du tah a vongpaw a cang. Kama cawh hringnah aa hnui khy nápawtah le hringnah a hlupui tah aa hnui khy nápawtah ka vong hi.

<sup>11</sup> Kama heh tuukingtu chaw cawh ka cang. Tuukingtu chaw taco a tuu cawtah a hringnah a peh. <sup>12</sup> A hlofapaw tuukingtu cawh tuu a hnuitupaw cang be, macawtaco chahnia a va chuapaw khah a hmuh tihtah tuu sahlo khah hningchai si he ka, a sai. Mataico chahnia taco tuurung khah ty he ka, a papaipatlaw he. <sup>13</sup> Cawngsawpaw cawh a sai, zecawtamaw tatah ama cawh a hlofapaw hlang chongpaw cang ka, tuu sahlo kong khah a pacangpaw cang be.



<sup>14</sup> Tuuking chaw cawh kama heh ka cang. Ka tuu khah hnih he neh ka, ka tuu zong tah aa pa hni hrah. <sup>15</sup> Paw tah pa hnih katei, Kama tah Paw khah ka hnipaw hratah a cang. Taico tuu sahlo caw taco ka hringnah ka peh. <sup>16</sup> Ma tuurung letei a cang lypaw tuu ahringpaw ka hnui vy he. Aaning sahlo zong khah ka va chuakhui he a. Aaning sahlo zong taco ka o nge a he ka, tuurung rungkheh le tuuking pakheh suitei a cang tae a. <sup>17</sup> Ka Paw tei a pa dopaw cawh ka hringnah ka pehnah rawng takhei a cang, ma cawh hmuh kaw taepaw khah a cang. <sup>18</sup> Ka hringnah heh ahotahmai pa chu khy bei he, canghrasala kama ka rei tah ka pehpaw a cang. Peh khynah naw hnui neh ka, lah kaw khynah naw zong ka hnui. Ma nawhnuinah heh ka Paw tai tah ka hmuhpaw a cang,” tatah a tah he.

<sup>19</sup> Ma bia rawng tahei Juda cawngsaw sahlo cawh a chaichy vy hui he. <sup>20</sup> Aaning letei mehlupui takhei, “Khachia tah a hrei ka, a hruh myca, zecawtamaw a bia naa nge?” tatah aa tah.

<sup>21</sup> Canghrasala ahringpaw takhei, “Ma bia heh khachia tah a tlepaw cawngsaw bia cang be. Khachia taco mehcopaw khah khua a hmuhsah khy maw?” tatah aa tah.

### *A zing lypaw Juda cawngsaw sahlo*

<sup>22</sup> Mataico behnah ing Pehlainah Panaw khah Jerusalem khuapui letah aa tua. Ma cawh thlasih chung tah cang ka, <sup>23</sup> Zisu cawh behnah indung chung Solomon dungkalung aa tahpaw lekhei a khiakaly leimei. <sup>24</sup> Juda cawngsaw sahlo taco cadung he ka, “Zetih tai maw lung langlo tah na

ma chia a? Khri na cang caco, a se pawtah ma ching thlang,” tatah aa tah.

<sup>25</sup> Zisu taco, “Ca ching thah he neh ka, canghrasala pa zing bei ceh. Ka Paw ming tei ka tuapaw ningang chuipaw sahlo tahei kama rei hy lytah aa rei thlang hi, <sup>26</sup> canghrasala zing bei he ceh, zecawtamaw tatah ka tuu naa cang lynah cawtah a cang. <sup>27</sup> Ka tuu taco ka o aa nge, aaning sahlo cawh hnih he neh ka, aa pazui. <sup>28</sup> Chaizaw hringnah pei he neh ka, lyde khaw bei he. Ahotahmai ka kih chung taitah pa chu khy bei he. <sup>29</sup> Aaning a pa peipaw ka Paw cawh zezongpui navy tah alai vy. Aaning sahlo cawh ka Paw kih chung taitah ahotahmai chu khy a bei he. <sup>30</sup> Kama le Paw cawh pungkheh kaa cang peh,” tatah a tah.

<sup>31</sup> Juda cawngsaw sahlo takhei Ama va ná pawtah alung a lah kaw hui he, <sup>32</sup> canghrasala Zisu taco aa hai letah, “Paw taiteipaw ningang chuipaw hming rungnawpaw a hlupui khah ka ca hmuhsah thah he. Ma hrong leco zehapaw hming takhei maw alung tah va tah thaw naa pa za?” tatah a tah he.

<sup>33</sup> Juda cawngsaw sahlo taco, “Ma sahlo rawng takhei alung tah va kaa ca zapaw cang be, cawngsaw na cang thlang naná teitah Khazing ka cang tatei na tahpaw, Khazing na reipachia navai takhei a cang,” tatah aa palei.

<sup>34</sup> Zisu taco aaning sahlo cawh, “Naa phungbia letah, ‘Naaning cawh khazing sahlo ka ca tah he,’<sup>☆</sup> tatah a cia bei maw? <sup>35</sup> Khazing tah a bia a tlungnah cawngsaw sahlo khah hmai, ‘khazing sahlo,’ tatah a y he. Taico Capathai cawh ro khy paw

---

<sup>☆</sup> **10:34** Hlaw 82:6

cang be tah cawh naa hni. <sup>36</sup> Paw tah a tei rua pawtah patlia ka, khazaw lehei a za tawpaw kama ka kong heh zekhatamaw a cang a? Mataico, zecawtamaw, ‘Khazing Sawcapaw ka cang,’ ka tahpaw heh Khazing a reipachia tatah naa pa tah? <sup>37</sup> Ka Paw tei a tuapaw khah ka tua ly caco, pa zing khe o. <sup>38</sup> Canghrasala ma cawh ka tua caco, naa pa zing ly tahmai tah ningang chuipaw sahlo heh zing o. Ma tih taco kama ka chung letah Paw a ungpaw le Paw a chung letah ka ungpaw khah naa hnithai a,” tatah a chai he. <sup>39</sup> Aaning sahlo taco tle a pachia kaw hui he ka, canghrasala a lysai he.

<sup>40</sup> Mataico Zisu cawh Jordan tuivaw cakah kaw ka, khuahlai tei Johan tah baptisma a cangsahnah hminghmaw lang khah a sei. Ma leco va ung ka, <sup>41</sup> cawngsaw hlupui Ama khatah a vong he. “Johan tahei ningang chuipaw paching pakhanah a tua bang ly naná teitah ma cawngsawpaw kong a reipaw vytei heh cawh ahmang cehceh,” tatah aa tah. <sup>42</sup> Taico ma hminghmaw leco mehlupui tah Zisu cawh aa zing.

## 11

### *Lazaru thihnah*

<sup>1</sup> Lazaru aa tahpaw cawngsawpaw cawh a sah. Ama cawh Bethani khuapaw cang ka, Bethani cawh Mari le a chuahruino Martha aa khua a cang. <sup>2</sup> Mari heh Abuipaw cung letah ringh-opaw bia katei, a sang tah a phe a hrupah no khah a cang. A sahpaw Lazaru heh a cawtei a cang. <sup>3</sup> Macawtaco a satei leh takhei Zisu cawh, “Abuipaw, na dopaw cawngsawpaw khah a sah ngetei,” tatah bia aa caw.

<sup>4</sup> Ma bia cawh a thui tihtah Zisu taco, “Ma asaw-nah heh thih nápw cang be. Ma asawnah cawh Khazing rungnawnah cawtah cang ka, ma thong khei, Khazing Sawcapaw zong tah rungnawnah a hmuh a,” tatah a tah. <sup>5</sup> Zisu taco Martha le a chuahruino le Lazaru cawh a do ngetei he. <sup>6</sup> Lazaru a sah tahpaw khah a thui naná teitah a ungnah leco ninghning a caang vy.

<sup>7</sup> Mataico a hningzuitu sahlo khah, “Judia raang lang sei kaw he peh,” tatah a tah he.

<sup>8</sup> Canghrasala aaning sahlo taco, “Cawngpahtu, kaa hninglang tei lekhei pui Juda cawngsaw sahlo takhei alung tah va aa ca za kha, ma lang cawh sei na pachia kaw thlangpaw cawh?” tatah aa tah.

<sup>9</sup> Zisu taco, “Ching cai letah suimehlang hluihning ung bei maw? Ching tah a khiapaw cawngsaw cawh a pachih a be, zecawtamaw tatah khazaw khainá khei khua a hmuh cawtah. <sup>10</sup> Zai tah a khiapaw cawngsaw cawh a pachih a, zecawtamaw tatah khainah a hnuilynah cawtah,” tatah a palei he.

<sup>11</sup> Ma bia a rei khy taitah a ching vypaw he cawh, “Kaa vesawpaw Lazaru cawh a ihning thah, canghrasala ama pahrá pawtah ka sei a,” tatah a chai he.

<sup>12</sup> A hningzuitu sahlo taco, “Abuipaw a ihning caco, a dang vy thlang a,” tatah aa tah. <sup>13</sup> Lazaru a thi tahpaw khah Zisu tah a rei leimei naná teitah a hningzuitu sahlo taco ihning cakhawngpaw a rei rua tatah aa rawh.

<sup>14</sup> Macawtaco Zisu taco a sepaw tah, “Lazaru a thi thah, <sup>15</sup> canghrasala naa zing khy nápwatah naa cawtah ma letei ka ung lypaw cawh ka thaw

a chah caimang. Ama khatah va sei tua he peh,” tatah a ching he.

<sup>16</sup> Mataico Thomas (Didama aa tahpaw) takhei a tangpaw a hningzuitu sahlo hai le co, “Ama kha thih hrá pawtah sei hrá he peh,” tatah a tah he.

*Zisu tah Lazaru a satei leh khah thlaw a palung he*

<sup>17</sup> A va phah ning taco Lazaru cawh athlai letah aa phungnah taitah ningpali a tah thah takhah Zisu tah a hmuh. <sup>18</sup> Bethani khua cawh Jerusalem khuapui taitah khanghning tluh a hlah ka, <sup>19</sup> aa cawtei a thih cawtah khei Mari le Martha khah a ty khui pawtah Juda cawngsaw ahlupui a va chuh he. <sup>20</sup> Zisu a va sei leimei tahpaw khah Martha tah a thui tihtah va dai pawtah piathlah ka, Mari tu cawh ing letah a ung thlang.

<sup>21</sup> Martha taco Zisu hai letah, “Abuipaw, ma lehei ung thlang lacaw, ka cawtei cawh a thih tlung be. <sup>22</sup> Canghrasala ato lehei zong na haepaw maikaw cawh Khazing tah a ca peh thlang a tah cawh ka hni,” tatah a tah.

<sup>23</sup> Zisu tah Martha hai leco, “Na cawtei cawh a tho kaw a,” tatah a tah.

<sup>24</sup> Martha taco, “Caichangnah letei thokawnah leco a tho kaw a tah cawh ka hni thlang,” tatah a chai.

<sup>25</sup> Zisu taco a hai letah, “Kama heh thokawnah le hringnah cawh ka cang. A pa zingpaw cawngsaw cawh a thih tahmai tah a hring a, <sup>26</sup> taico kama zing hmotah a hringpaw maikaw cawh thi by bei he. Ma bia cawh na zing maw?” tatah a tah.

<sup>27</sup> “A cang, Abuipaw, nama cawh khazaw letah a vong lepaw Khazing Sawcapaw Khri na cang tah ka zing,” tatah a tah.

<sup>28</sup> Taico Martha cawh ma bia a rei khy taico va sei kaw ka, a chuahruino Mari khah aparuh teitah a va y, “Cawngpahtu ma lehei ung ka, a ca ding leimei kho!” tatah a tah. <sup>29</sup> Ma bia cawh a thui tihtah Mari cawh rairang tah tho ka, Zisu a tong rua pawtah khei a sei. <sup>30</sup> Zisu cawh khuachung lang khah a va nae thlah balang be, Martha tei a va dainah hminghmaw lekhei a ung thlang. <sup>31</sup> Mari a tykhuipaw khatah ing letah a ungpaw he Juda cawngsaw sahlo takhei he Mari rairang tah tho katei, a piathlahpaw khah hnih he ka, thlai lang caw rua pawtah a sei rua tah he ka, aa zui.

<sup>32</sup> Mari taco Zisu a ungnah hminghmaw khah va phah ka, a hmuh tihtah a phehrang leco a khuh panai ka, “Abuipaw, ma lehei ung thlang la caw, ka cawtei cawh a thi lung be,” tatah a tah.

<sup>33</sup> Zisu cawh Mari a cawpaw le ama khatei aa ka seipaw Juda cawngsaw sahlo zong aa caw hrah-paw khah a hmuh tihtah a hnahru cai ka, a lung a ny. <sup>34</sup> “Zeletamaw naa phung?” tatah a hae he.

“Abuipaw, a vong la, va ming tua,” tatah aa palei.

<sup>35</sup> Zisu cawh a cah.

<sup>36</sup> Mataico Juda cawngsaw sahlo takhei, “Zetlua tamaw a do tahpaw mingtua hmai o!” tatah aa tah.

<sup>37</sup> Canghrasala aaning letei thaikhehpaw sahlo takhei, “Mehcopaw a meh khua a hmuhsah khy-paw cawngsaw taco ma cawngsawpaw heh thih lytah ungsah khy rua bei maw?” tatah aa tah.

*Zisu tah Lazaru khah thihnah taitah a patho*

<sup>38</sup> Zisu cawh a ngechia ngetei hmo khei thlai lang khah a vaw. Ma thlai cawh lungkua, a kaw khah alung tah aa khapaw a cang. <sup>39</sup> “Alung heh lawhly tua o,” tatah a tah.

Canghrasala a thipaw cawngsaw a sateino Martha takhei, “Abuipaw, kaa phung ná tah ning-pali cang myca ka, a hnang ngetei tha a,” tatah a tah.

<sup>40</sup> Mataico Zisu tah, “Na zing caco, Khazing rungnawnah na hmuh a takhah ca ching thah bei neh maw?” tatah a tah.

<sup>41</sup> Macawtaco alung cawh aa lahly. Mataico Zisu cawh avai lang a y ka, “Ka Paw, na pa thuipah cawtah ka ca lawng. <sup>42</sup> Ka bia na pa thuipah tei takhah ka hni, canghrasala ma heh cawh ma letei a daw thlangpaw cawngsaw sahlo cawtah ka reipaw a cang, aaning sahlo tahei kama cawh nama tah na tawpaw a cang tahpaw aa zing khy nápwatah,” tatah a tah.

<sup>43</sup> Ma bia a rei khy leco, Zisu cawh a thangpui tah, “Lazaru, ka pia!” tatah a y. <sup>44</sup> A thipaw cawngsaw cawh pai anaipaw tei a kih le a phe tongchai hmo le a hme pailu bakhu hmo khei a ka pia.

Zisu taco aaning sahlo cawh, “Rawh pai sahlo heh pahlu pá la, sei sá law,” tatah a tah he.

*Zisu aa ruinah*

*(Mt 26:1-5; Mk 14:1-2; Luk 22:1-2)*

<sup>45</sup> Macawtaco Mari a ty khui rua tah va chuh he katei, Zisu a hming tuapaw a hmuhpaw Juda cawngsaw mehlupui taco, Zisu khah aa zing.

<sup>46</sup> Canghrasala aaning letei thaikhhehpaw sahlo

cawh Farasi sahlo khakhei a vaw he ka, Zisu a hming tuapaw khah aa va ching he. <sup>47</sup> Mataico, tlangbui macang sahlo le Farasi sahlo taco bi-acetu Sanhedrin phu khah a pahmosah he ka, “Zekhatamaw kaa tua a? Ma cawngsawpaw tahei ningang chuipaw paching pakhanah a hlupui a tua leimei tlung. <sup>48</sup> Ma hrahei kaa seisah thlang tei a cang caco, ming maikaw tah ama cawh zing a he ka, mataico Rom cawngsaw va chua he ka, kaa behnah ing le kaa raang khah aa ma lah pah a,” tatah aa tah.

<sup>49</sup> Mataico aa hrong letei pakhehpaw Kaiafa aa tahpaw ma kung letei tlangbui alaicaipaw a cangpaw taco, “Zehmai hnih bei ceh. <sup>50</sup> Raang pungpaluh a ro navy tah cawngsaw zawpui caw-tah pakheh thih cawh a chah vy tahpaw heh hnih bei ceh maw?” tatah a tah he.

<sup>51</sup> Ma bia heh ama lungthó tah a reipaw cang be, ma kung lekhei tlangbui alaicaipaw a cang-paw hrakhei Juda mingphing cawtah Zisu a thi a tah le, <sup>52</sup> Juda mingphing caw long tah cang ly-tah Khazing sawtei a papaipatlappaw sahlo khah hmingkheh tah va chuakhui tei, sangkheh tah tua ruapaw he tah a thi a tatah bia a phyhlangpaw a cang. <sup>53</sup> Macawtaco ma ning taico Zisu cawh thaw rua pawtah khei khua aa khang.

<sup>54</sup> Macawtaco, Zisu cawh Juda cawngsaw sahlo hrong lekhei langhai tah a khialai khawh be. Ma taikhei piathlah ka, raangcaa kae letei a ungpaw Efraim aa tahpaw khua lang khah sei ka, ma leco a hningzuitu sahlo khatah aa va ung.

<sup>55</sup> Ma cai heh Juda cawngsaw sahlo Khungsai Panawnah cai khah a cang daimang tei myca.



Ming hlupui cawh aa ungnah khua cacy taikhei Jerusalem khuapui lang khah panawnah cawtah phungbia hratah a pathai a pahling rua pawtah khei a sei tlungmang myca he. <sup>56</sup> Zisu cawh huilai he ka, behnah ingdung chung letah a daw thlang he ka, pakheh le pakheh cawh, “Zekhatamaw na rawh? Panawnah lang heh a va chuh thly a na tah maw?” tatah aa hae he. <sup>57</sup> Canghrasala tlangbui macang sahlo le Farasi sahlo tah Zisu khah tle aa du cawtah a ungnah aa hnihpaw maikaw tah naa ma ching a, tatah naw aa peh he.

## 12

*Zisu cawh Bethani khua letah ringthopaw thu a cang*

*(Mt 26:6-13; Mk 14:3-9)*

<sup>1</sup> Khungsai Panawnah hlai ningruh lekhei Zisu cawh thihnah taitei a pathopaw Lazaru a ungnah khua Bethani khah a va phah. <sup>2</sup> Ma leco Zisu pasungpanaw napaw cawtah zairia dung hruinah tuapah he ka, Martha cawh batui peitu cang ka, cabuai cadung tei a ty thlangpaw he hrong lekhei Lazaru cawh Zisu khaco a ty hrah. <sup>3</sup> Mataico Mari tah nard thingkungpaw taitah lahpaw, a patahpaw, a mai a ru ngeteipaw, sathy ringthopaw kia\* songthung tluh khah law ka, Zisu a phe leco bia ka, a sang tah a hrupah. Taico ing chung cawh ringthopaw a ring takhei a rung thlu.

<sup>4</sup> Canghrasala a hningzuitu pakheh a cangpaw Judas Iskariot, a hning tah ama a luitupaw takhei, <sup>5</sup> “Ma ringthopaw khah zua tah a mai cawh

---

\* **12:3** Kia,heh gram,khatah a lo.

mehsisah khah peh hri ruapaw he cang bei maw? Ma khah kung kheh nihlo mai pui a cang caw!” tatah a tah. <sup>6</sup> Ma bia a reipaw heh mehsisah kong a pacang cawtah cang lytah mehru cang ka, a kaipaw tangkabawng chung taikhei a za lah leimei tei cawtah a cang.

<sup>7</sup> Zisu taco, “Ama khah hna hnawh khe o. Ka rawh phung ning cawtah ma ringthopaw cawh pacung thlang ky seh. <sup>8</sup> Mehsisah cawh naa hrong letah a ung paria thlang he, canghrasala Kama cawh ung paria bei neh,” tatah a palei.

<sup>9</sup> Ma letei Zisu a ungpaw khah Juda cawngsaw rung-pui takhei hnih he ka, a vong he. Ma cawh Zisu a ung caw long takhei cang lytah thihnah taitah a pathopaw Lazaru hmuh du takhei zong a cang. <sup>10</sup> Macawtaco tlangbui macang sahlo takhei Lazaru khah thaw pai hrápaw tah khua aa khang, <sup>11</sup> zecawtamaw tatah ama a rawng tah Juda cawngsaw ahlupui cawh Zisu khatah a vaw he ka, aa zingnah cawtah a cang.

*Tenah kha a naenah*

*(Mt 21:1-11; Mk 11:1-11; Luk 19:28-40)*

<sup>12</sup> Ningthlamongpaw cawh Khungsai Panawnah a va zopaw cawngsaw rung-pui takhei Jerusalem khuapui lang Zisu a va sei a tahpaw khah aa thui. <sup>13</sup> Aaning sahlo taco atung kung a cai khah thlia he ka, va dai rua pawtah aa sei.

“Hosana!†

Abuipaw ming tei a vongpaw cawh bonghnang song tah ung ky seh.

---

† **12:13** Hosana cawh Hebru rei cang ka, a silang cawh, Pachah,tahnah a cang.

Israel Siangpahrang cawh bonghnang song tah ung ky seh,”✧

tatah aa y lai. <sup>14</sup> Zisu tah la teitei khah hmuh ka, a cung leco a ke, Capathai letei siapaw hratah,

<sup>15</sup> “Zion sawcanu, na thlawzawng kheh seh.

Mingtua, na Siangpahrang cawh la teitei va ke lai ka, a vong leimei.”✧

tah heh a cang.

<sup>16</sup> Athoning taco a hningzuitu sahlo cawh ma heh thuithai bei he. Zisu parungnaw a cang khy taitah longlong, ma hming sahlo heh ama a kong aa siapaw hratah a cung letah aa tua ky he, takhah aa hni thai.

<sup>17</sup> Ama khatah a ungpaw cawngsaw rungpu takhei Zisu tah Lazaru khah athlai chung lekhei y ka, thihnah taitah a patho tahpaw bia khah aa reipachaw lai. <sup>18</sup> Zisu tah ningang chuipaw paching pakhanah a tua tahpaw cawh aa thuinah cawtah cawngsaw hlupui cawh ama a tong rua paw takhei a sei he. <sup>19</sup> Macawtaco Farasi sahlo cawh pakheh le pakheh khah, “Mingtua hmai la, zekhatah tah khy khawh bei peh hi. Khazaw pungpaluh tah pui aa zui myca he!” tatah a tah he.

*Zisu tah a thih nápw kong a reihlang*

<sup>20</sup> Khungsai Panawnah zo tei a seipaw he sahlo hrong lekhei Grik cawngsaw thaikheh a ung hrah he.

<sup>21</sup> Aaning sahlo cawh Galili raang, Bethsaida khua letah a ungpaw Filip khakhei a vong he ka, “Abuipaw, Zisu hmuh kaa du,” tatah aa tah.

<sup>22</sup> Filip taco Andru khah a va ching; aa pahning co va sei he ka, Zisu cawh aa va ching.

<sup>23</sup> Zisu tah, “Cawngsaw Sawcapaw parungnaw-nah cai cawh a va chuh myca. <sup>24</sup> Biahmuisui ka ca ching he, alui letah a tlahpaw sacaang hmu cawh a thih lypaw co sangkheh teitah a cang paria thlang. Canghrasala, a thih taikhei longlong sacaang hmu a hlupui a chuasah. <sup>25</sup> A hringnah a dopaw cawngsaw taco sung a ka, ma khazaw letei a hringnah a huapaw cawngsaw taco chaizaw hringnah letah a chia a. <sup>26</sup> Ka rai a hrepaw taco pazui ka, ka ungnah letah ka raihretu cawh a ung hrá a. Ka rai a hrepaw cawngsaw cawh ka Paw tah a cuicaling a.

<sup>27</sup> Atoheh cawh ka lung reithui ka, zemaw ka rei a? ‘Ka Paw, ma suimehlang cai taihei pa pachah tua,’ ka tah a maw? Cang be, ma cawpaw hrahring tahei ma suimehlang cai lehei ka vongpaw cang tlung ka. <sup>28</sup> Ka Paw, na ming a rungnawnah palang my lo!” tatah a tah.

Mataico avai taitah, “Ka parungnaw thah, taico ka parungnaw vy a,” tatah o a za ring. <sup>29</sup> Ma leco ung katei, ma o a thui paw cawngsaw rung pui taco khalung a thih tah he ka, ahringpaw sahlo takhei, “Vaiming tah bia a ching,” tatah aa tah.

<sup>30</sup> Zisu taco, “Ma o heh Kama ka cawtah cang be, naaning naa chahnah cawtah a cang hri. <sup>31</sup> Khazaw biacenah cai cawh atoheh a cang, ato lehei khazaw uhtu bui cawh tingchua a cang tae a. <sup>32</sup> Canghrasala alui taihei calingchy ka cang tihtah Kama hrahring tah ming vytei khah Kama kha ka kui he a,” tatah a tah. <sup>33</sup> Zekhatamaw a thih a tahpaw hmuhsahnah takhei ma bia heh a reipaw a cang.

<sup>34</sup> Cawngsaw zawpui taco, “Phungbia leco Khri<sup>‡</sup> cawh chaizaw tah a hming a tatah kaa thui. Zecawtamaw, ‘Cawngsaw Sawcapaw cawh khraws chung letah caling tah khaipai a cang a,’ tatah na tah? ‘Cawngsaw Sawcapaw,’ cawh ahomaw a cang?” tatah aa tah.

<sup>35</sup> Mataico Zisu tah, “Cai a cawngpe chung cy khainah naa hnui a. Khainah naa hnui chung tahei a khia o, muinah tah a ca phah hlai he tahei. A muinah letah a khiapaw cawngsaw taco zelang maw a sei tahpaw hnih be. <sup>36</sup> Khainah naa hnui chung tei lehei khainah leco naa zingnah cawh chia my lo, ma pawsui co khainah sawtei tah naa cang khy a,” tatah a ching he. Bia a reipaw a pachang tihtah Zisu cawh piathlah ka, aaning sahlo cawh a nosai he.

*Juda cawngsaw sahlo takhei zing hlui bei he*

<sup>37</sup> Zisu tah aa hmekaw letei ma vytei ningang chuipaw paching pakhanah sahlo a tua khy taihei hmai aaning sahlo taco zing hlui bei he. <sup>38</sup> Ma heh Khazing khuavang Isaiah tei a reipaw:

“Abuipaw, aho tamaw kaa bia zing ka,  
 aho kha tamaw Khazing tah a kih thawtlung-  
 nah cawh a langsa?”<sup>✧</sup>  
 tahpaw a tlingnah khah a cang.

<sup>39</sup> Ma rawng tahei zing khy bei he, zecawtamaw tatah Isaiah tei a rei vypaw cawh,

<sup>40</sup> “Ama tah aa meh co sah he ka,  
 aa lungthing a mosah he,  
 macawtaco aa me tah hmuh khy be ca he ka,

<sup>‡</sup> 12:34 A cang ly leh Mesiaha cang. <sup>✧</sup> 12:38 Isai 53:1

aa lung tah hnih thai bei he, ma hrátei a cang ly caco,  
 a paleh kaw he ka, ka dangsah thá he a,”<sup>☆</sup>  
 tatah a tah. <sup>41</sup> Isaiáh tei ma bia a reipaw heh Zisu rungnawnah khah hmuh ka, a kong khah a reipaw a cang.

<sup>42</sup> Ma naná co hruitu sahlo letei mehlupui takhei hmai Zisu cawh aa zing thlang. Canghrasala Farasi sahlo rawng takhei kaa zing tah ngang bei he, zecawtamaw tatah synagog taitah aa ma papia sua a, takhah aa phang cawtah a cang;  
<sup>43</sup> zecawtamaw tatah aaning sahlo cawh Khazing taitei pachawnah navy khei cawngsaw taitei pachawnah khah aa tlechai vy cawtah a cang.

<sup>44</sup> Mataico Zisu cawh, “Kama a pa zingpaw cawngsaw cawh kama longtei a pa zing cang lytah a pa tawtupaw zong khah a zing hrah. <sup>45</sup> Kama a pa ming tihtah a pa tawtupaw zong khah a hmuh pai. <sup>46</sup> Kama cawh khazaw lehei khainah hratah a vong neh ka, a pa zingpaw maikaw cawh a muinah letah ung thlang bei he.

<sup>47</sup> Ka bia thui thlang katei, a zui lypaw cawngsaw cawh Kama tah biace pá bei neh, zecawtamaw tatah khazaw bia ce pá pawtah a vongpaw cang be ca neh ka, pachah a pawtah a vawngpaw ka cang hri. <sup>48</sup> Kama pahlawh katei, ka bia a cyhlang lypaw cawngsaw caw taco biacetupaw a ung thlang. Ka reipaw bia ceingei tahei ama cawh caichangnah letah thaily a cang sá a. <sup>49</sup> Zecawtamaw tatah Kama ka tua chawngpaw tah ka reipaw cang lytah Paw, a pa tawtupaw

---

<sup>☆</sup> **12:40** Isai 6:10

tei zemaw reipaw, zekhatamaw reipaw tah bia a pa pehpaw tukhah ka reipaw a cang hri. <sup>50</sup> A biapéh cawh chaizaw hringnah a phahkhuitu a cang takhah Kama cawh ka hni. Macawtaco ka reipaw maikaw cawh Paw tei rei ruapaw a pa tahpaw longtei khah a cang,” tatah o thang puitah a y.

## 13

### *Zisu tah a hningzuitu sahlo khah aa phe a si he*

<sup>1</sup> Ma heh Khungsai Panawnah hlai tah a cang. Zisu taco khazaw piasai tei Paw khatah a sei nápw cai khah a va chuh myca takhah a hni. Khazaw letei a ungpaw, a tei a cangpaw sahlo khah a do tunah caw he tah zetlua tamaw a do he takhah a hmuhsah he.

<sup>2</sup> Zai batui aa cadung ning takhei Setan tah Simon a sawcapaw Judas Iskariot lungchung leco Zisu lui nápw rawhnah khah a khung thah. <sup>3</sup> Zisu taco Paw tah ka hmingtuakhynah rai letah zezongpui a chia tah le kama cawh Khazing taitah a vongpaw cang neh ka, Khazing kha ka sei kaw a tahpaw khah a hni. <sup>4</sup> Taico batui cadungnah taico tho ka, a angki a cung lang teipaw khah pahu ka, a te letah pavuapai a pangia. <sup>5</sup> Ma khy taico cawtaw letah tui cawh tlai ka, a hningzuitu sahlo cawh aa phe khah si he ka, a te letei a pangiapaw pavuapai co a hrupah he.

<sup>6</sup> Simon Piter kha a vaw ka, Piter taco a hai letah, “Abuipaw, nama pui tamaw ka phe na pa si a?” tatah a tah.

<sup>7</sup> Zisu taco, “Zemaw ka tua tahpaw hnih bei ceh, canghrasala, a hning tah na hni tae thlang a,” tatah a palei.

<sup>8</sup> Piter taco, “Cang be, ka phe cawh pa si by bei ceh,” tatah a tah.

Zisu taco, “Ka ca si ly caco, kama a pa zuitu cang khy khaw bei ceh,” tatah a chai.

<sup>9</sup> Simon Piter taco, “Abuipaw, catei a cang caco, ka phe long cang lytah ka kih le ka lu zong pa si pai thlang,” tatah a palei.

<sup>10</sup> Zisu taco, “A ngai a si thahpaw cawngsaw cawh a phe suipaw heh si a hia. A pungpaluh cawh a pathai thlang. Taico naaning cawh na pathai thlang he ceh, canghrasala naa zongmingtei co cang bei he ceh,” tatah a chai.

<sup>11</sup> Zecawtamaw tatah ahomaw a pa lui a takhah a hni cawtah cang ka, macawtaco naa zongmingtei co pathai bei he ceh a tahpaw khah a cang.

<sup>12</sup> Aa phe a si khy tai he co a angki cawh a hrei kaw ka, a ungnah lang khah a vaw ka, “Naa caw tei ka tuapaw khah naa hnithai maw?” tatah a hae he. <sup>13</sup> Naaning taco, “ ‘Cawngpahtu,’ le ‘Abuipaw,’ tatah pa y he ceh ka, a hmang ngetei, zecawtamaw tatah ma cawh ka cang hmuisui. <sup>14</sup> Ato lehei kama, naa Buipaw le cawngpahtu tahei hmai naa phe ka ca si caco he naaning zong pakheh le pakheh naa phe a sipah cy my lo. <sup>15</sup> Kama heh a pa mingpai na he ceh seh tatah naa phe ka ca sipaw he khah a cang. <sup>16</sup> Biahmuisui ka ca ching he, sae cawh a buipaw navy tah lai vy be ca ka, siapaw zong a siatu navy tah lai vy hrah be. <sup>17</sup> Atoheh cawh ma hming sahlo heh naa hni myca, ma sahlo cawh naa tua caco, bonghnang song na cang he ceh.



*Ama lui nápw Zisu tah a reihlang  
(Mt 26:20-25; Mk 14:17-21; Luk 22:21-23)*

<sup>18</sup> Naa zongmingtei khei ka ca tahpaw he cang be; ka thingpaw sahlo cawh ka bi thlang he. Canghrasala ma heh Capathai letei, ‘Ka very a e hrahpaw takhei a phengavang hmo a pa paleh so,’<sup>☆</sup> tahpaw tlingnah khah a cang.

<sup>19</sup> Hming a va cang tihtah kama cawh ama khah ka cang tahpaw naa zing khy nápwat ah to a cang hlai tahei ka ca chingpaw he a cang. <sup>20</sup> Biahmuisui ka ca ching he, ka tawpaw cawngsaw a cyhlangpaw he cawh kama a pa cyhlangpaw cang he ka, kama a pa cyhlangpaw he cawh a pa tawtupaw a cyhlangpaw a cang he,” tatah a tah.

<sup>21</sup> Ma bia a rei khy taico, Zisu cawh a lung reithui ka, “Biahmuisui ka ca ching he, naaning letah pakheh tah naa pa lui a,” tatah a tah he.

<sup>22</sup> A hningzuitu sahlo cawh pakheh le pakheh khah a ming he ka, “Ahomaw a ma tahnang tu he?” aa tah he. <sup>23</sup> Aaning letei pakheh, Zisu tei a dopaw a hningzuitu cawh ama a kae lekhei a ty thlang. <sup>24</sup> Simon Piter takhei ma a hningzuitu cawh a mehnaw tuapah ka, “Ahomaw na tahnang?” tatah hae law a tah.

<sup>25</sup> Ma cawngsawpaw taco Zisu khah a va ne ka, “Abuipaw, ma paw cawh ahomaw a cang?” tatah a hae.

<sup>26</sup> Zisu taco, “Ma cawngsawpaw cawh bakang letah very heh ka nong khy taitah ka pehpaw cawngsaw khah a cang a,” tatah a chai. Mataico very cawh nong ka, Simon a sawcapaw Judas Iskariot khah a peh. <sup>27</sup> Judas tah very khah a hlang

---

<sup>☆</sup> 13:18 Hlaw 41:9

cangkaw tei leh a chunglang khah Setan cawh a nae.

Zisu taco, “Na tua ruapaw cawh tua tlamang thlang,” tatah a tah. <sup>28</sup> Canghrasala Zisu tah ma hratei a tahpaw khah batui a dungpaw ahotahmai tah thuithai bei he. <sup>29</sup> Judas cawh tangka a kaipaw a cangnah cawtah, “Zisu tahei Panawnah cawtah a hiapaw cawh rua pawtah a ching rua, a cang ly leh mehsisah khah hming sangkheh kheh pei bang law a tah rua,” tatah cawngsaw thaikhehpaw tah aa rawh. <sup>30</sup> Judas cawh very khah a hlang cangkaw tei leh a piahly. Taico ma cawh zai tah a cang.

*Piter tei a paphah sai ná Zisu tah a reihlang*

<sup>31</sup> A sei khy taico Zisu tah, “Atoheh cawh Cawngsaw Sawcapaw heh parungnaw cang myca ka, Ama leco Khazing zong parungnaw a cang myca.

<sup>32</sup> Ama letah Khazing cawh parungnaw a cang caco, Khazing taco Ama ceingei letah Sawcapaw cawh parungnaw a ka, ry lytah a parungnaw palang a.

<sup>33</sup> Ka sawtei sahlo, naaning khatah cai a cuitei suipaw ka ung a. Pa hui he ceh ka, Juda cawngsaw ka chingsipaw he hrakhei atoheh ka ca ching hrah he. Ka seinah lang cawh va sei khy bei ceh.

<sup>34</sup> Biapah thapaw ka ca peh he: Pakheh le pakheh a do cy my lo. Ka ca dopaw he hrakhei pakheh le pakheh a do cy my lo. <sup>35</sup> Pakheh le pakheh na do cy caco he ceh ma leco ming vytei tah ka hningzuitu naa cangpaw khah aa ca hni he a,” tatah a tah he.

<sup>36</sup> Simon Piter taco Zisu cawh, “Abuipaw, zelang maw na sei a?” tatah a hae.

Zisu taco, “Ka seinahpaw lang cawh ato lehei co pazui khy bei ceh, canghrasala, a hning tah na pazui tae a,” tatah a palei.

<sup>37</sup> Piter taco, “Abuipaw, zecawtamaw ato lehei ka ca zui khy be? Na caw taco ka hringnah ka pae hi,” tatah a tah.

<sup>38</sup> Mataico Zisu tah, “Ka cawtah na hringnah na peh hmuisui maw? Biahmuisui ka ca ching, aa a khawng hlai tah uithung tai na pa paphahsai a!

## 14

*Zisu tah a hningzuitu sahlo khah aa lunghnaw a pangang he*

<sup>1</sup> Naa lung rei a thuisah khe lo. Khazing zing la, kama zong pa zing hrah my lo. <sup>2</sup> Ka Paw a ing letah ungnah a khang hlupui a ung. Ma cawh cang lytah ung my seh la, ka ca ching tha he a. Naa cawtah ungnah hminghmaw tingtua rua pawtah ma lang cawh ka sei a. <sup>3</sup> Taico va sei neh ka, naa cawtah hminghmaw ka va tingtua a, ka ungnah letah naaning zong naa ung khy hrah nápawtah naaning lá pawtah ka vong kaw a. <sup>4</sup> Ka sei nápaw langpui cawh naa hni thlang kho,” tatah a tah he.

*Zisu cawh Paw kha seinah langpui a cang*

<sup>5</sup> Thomas taco a hai letah, “Abuipaw, zelang maw na sei a tah hmai kaa hni lypaw tah zekhata-maw langpui cawh kaa hni thai a?” tatah a tah.

<sup>6</sup> Zisu taco, “Kama heh langpui le biahmuisui le hringnah cawh ka cang hi. Kama lang tah aa va sei lypaw co ahohmai Paw kung tlung khy a bei he. <sup>7</sup> Naa pa hni hmuisui caco ka Paw naa hni hra

a. Atoning taihei Ama cawh hnih he ceh ka, naa hmuh thah myca,” tatah a chai.

<sup>8</sup> Filip taco, “Abuipaw, Paw cawh ma hmuhsah la, ma cawh kaa cawtah a zaw thlang a,” tatah a tah.

<sup>9</sup> Zisu taco, “Filip, ma vytei naaning khatah ka ung khy tai lehei hmai pa hnih ting bei ceh maw? Kama a pa hmuhpaw taco Paw khah a hmuh myca, zecawtamaw, ‘Paw cawh ma hmuhsah tua,’ na tah thlang? <sup>10</sup> Kama cawh Paw letah ung neh ka, Paw cawh Kama letah a ung tahpaw heh zing bei ceh maw? Naaning khatei bia ka reipaw heh Kama taiteipaw a cang tlung be. Paw, Kama letei a ungpaw tah ma rai heh a hre. <sup>11</sup> Kama cawh Paw chung letah ung neh ka, Paw cawh ka chung letah a ungpaw khah zing thlang. Ma cawh na zing khy ly tahmai ningang chuipaw ka tuapaw rawng chang tahei zing thlang. <sup>12</sup> Biahmuisui ka ca ching he, Kama letah zingnah a hnuipaw taco ka tuapaw khah aa tua hrah a. Zecawtamaw tatah Paw kha ka sei a navai tahei, ma sahlo navy tei a rungnaw vypaw hming sahlo hmai khah aa tua a. <sup>13</sup> Taico, ka ming tei naa haepaw maikaw khah ka tua a. Ma cawh Paw rungnawnah khah Sawcapaw letah a lang napawtah a cang. <sup>14</sup> Ka ming tah zezongpui hae la, ka tua a.

*Zisu tah Thlawpaw Pathai bia a kang he*

<sup>15</sup> Naa pa do caco, ka biapah heh naa nge a. <sup>16</sup> Taico Paw khah hae a neh ka, Ama taco naaning khatah chaizaw ung a pawtah ahringpaw Singchingtu, biahmuisui a kaitu Thlawpaw khah a ca pae he a. <sup>17</sup> Khazaw tahei Ama cawh cyhlang khy

be, zecawtamaw tatah Ama cawh hmuh be ca ka, hnih hrah be. Canghrasala naaning taco naa hni, zecawtamaw tatah Ama cawh naaning khatah ung ka, naa chung letah a ungparianah cawtah a cang. <sup>18</sup> Haraw kingry hratah ca seisai bei neh, naaning kha ka vong kaw a. <sup>19</sup> A cawngpe khy leco khazaw tahei pa hmuh khaw be, canghrasala naning taco naa pa hmuh a. Zecawtamaw tatah ka hringnah cawtah hei na hring hrá he ceh. <sup>20</sup> Ma ning leco kama cawh ka Paw chung letah ka ungpaw le naaning cawh Kama letah naa ungpaw le Kama cawh naaning letah ka ungpaw khah naa hnithai a. <sup>21</sup> Ka biapéh thui katei a ngepaw maikaw cawh a pa dopaw cawngsaw a cang he. Kama a pa dopaw cawngsaw cawh ka Paw tah do he ka, Kama zong tah do he neh ka, ama leco Kama ceingei ka hmuh sá he a,” tatah a chai.

<sup>22</sup> Mataico Judas (Judas Iskariot khah cang be) takhei, “Abuipaw, zecawtamaw kaaning a hmuh sápw taco a pachia ceh ka, khazaw a hmuh sápw taco na pachia be?” tatah a tah.

<sup>23</sup> Zisu taco, “Kama a pa dopaw taco ka cawngpahnah khah a nge a. Ama cawh ka Paw tah do ka, ama khaco, a vong peh ka, ama khatah ka cinglai a peh. <sup>24</sup> Kama a pa do lypaw cawngsaw taco ka cawngpahnah khah nge be. Ma naa thui paw bia sahlo heh kama ka bia cang bei he. Kama a pa tawtupaw Paw a bia a cang.

<sup>25</sup> Naaning kha ka ungchung tahei ma vytei heh ka ca ching thah he. <sup>26</sup> Canghrasala, Singchingtu a cangpaw Thlawpaw Pathai, Paw tei ka ming tah a za taw lepaw takhei zezongpui ca ching a he ka, ka rei ciapaw bia vytei khah a ca hnisah hry he

a. <sup>27</sup> Thlawlungnah ka ca chiapah si he, Kama ka thlawlungnah khah ka ca peh he. Khazaw tei a ca pehpaw he hratah ca pei bei neh. Naa lung rei a thuisah khe la, ci khe lo.

<sup>28</sup> ‘Sei neh ka, naaning kha ka vong kaw a,’ ka tahpaw naa thui thlang kho. Naa pa do caco, Paw kha ka sei a ka tahpaw heh naa thaw a cha a, zecawtamaw tatah, Paw cawh Kama navy tah a rungnaw vy. <sup>29</sup> Hming a va cang tihtah naa zing khy nápwatáh ato a cang hlai lehei ka ca ching pacia thlu thah he hi. <sup>30</sup> Naaning khatah bia sypui rei hmai khaw bei nei, zecawtamaw tatah khazaw uhtu bui a vong leimei myca. Ama cawh ka cung letah hmingtuakhynah hnui be. <sup>31</sup> Canghrasala Paw ka dopaw le ka Paw tei bia a pehpaw khah achaw teitah ka tua tahpaw cawh khazaw tahei a hni hrahing a.

A vong la, sei he peh,” tatah a tah he.

## 15

### *Misur zung le a cai sahlo*

<sup>1</sup> “Kama heh misurzung hmuisui cawh cang neh ka, ka Paw cawh buichung hnuitu a cang. <sup>2</sup> Ama taco kama letei a cai a thui a thui lypaw maikaw cawh chawhly a ka, a cai a thui paw maikaw khah thui vy lo leimei seh tatah pathai pahling teitah a tua a. <sup>3</sup> Naaning cawh ka ca ching tha hpaw he bia khei pathaipahlingsah ciapaw na cang he ceh. <sup>4</sup> Kama lehei ung la, naaning letah ka ung hrá a. Zehapaw a cai hmai ama tei co thui khy be, a zung letah a pazo ceingeipaw a cang. Ka chung letah naa ung ly caco thui khy bei ceh.

<sup>5</sup> Kama heh a zung cawh ka cang, naaning cawh a cai na cang he ceh. Ahohmai kama letah ung ka, ama letah ka ung hrah caco, thui hlupui a thui a. Kama kha na pazo ly caco he ceh zehmai tua khy a bei ceh. <sup>6</sup> Kama letei a ung lypaw cawh vathlang he katei, a uipaw cai hratah a cang a. Ma hapaw a cai cawh pakhong he ka, me lang bo he ka, a kang thlu tei. <sup>7</sup> Kama letah naa ung le naaning letah ka bia a ung caco, naa dupaw maikaw khah hae la, peh na cang he ceh. <sup>8</sup> Thui a hlupui naa thui caco, ma cawh ka Paw rungnawnah cang ka, ka hningzuitu na cang he ceh tah na langahnah pawhe ceh a cang.

<sup>9</sup> Paw tah a pa dopaw hratah ka ca do hrah he. Ka donah chung lehei ung paria thlang my lo. <sup>10</sup> Paw a biapah nge neh ka, a donah letah ka ung paria thlangpaw hratah ka biapah naa nge caco, ka donah letah na ung paria a he ceh. <sup>11</sup> Ma bia ka ca chingpaw he heh naa chung letah ka lawngnah a ung tei, na lawngnah pawhe ceh a chihlui khy nápwaw cawtah a cang. <sup>12</sup> Ka biapah cawh, 'Ka ca dopaw he hratah pakheh le pakheh a do cy my lo,' tahpaw heh a cang. <sup>13</sup> Huivesaw cawtah hringnah pehnah tai donah navy tah alai vypaw donah ung be. <sup>14</sup> Bia ka ca pehpaw he khah naa tua caco, ka vesaw na cang he ceh. <sup>15</sup> Sae tatah ca tah khawh bei neh, zecawtamaw tatah sae taco a buipaw a tuapaw khah hnih be. Huivesaw tatah ka ca tah hri myca he, zecawtamaw tatah ka Paw taitei ka thui paw vytei khah ka ca hnisah thlu thah he. <sup>16</sup> Naaung tah pa thing bei ceh, va sei tah a thui thui pawtah le a paruipaw thui thui rua pawtah

kama tah ka ca thing he. Mataico ka ming tei naa haepaw maikaw khah Paw tah a ca pae he a. <sup>17</sup> Ka biapew cawh, ‘Pakheh le pakheh a do cy my lo,’ tahpaw heh a cang.

*Khazaw tah hningzuitu sahlo a hua he*

<sup>18</sup> Khazaw tah a ca hua caco he kama a pa hua taw thah tahpaw khah naa thinglung letah chia thlang my lo. <sup>19</sup> Khazaw a tei naa cang caco, a tei hratah a ca do he a. Canghrasala naaning cawh khazaw a tei cang bei ceh, kama tah khazaw taihei ka ca thing thah myca he. Ma rawng tahei khazaw tah a ca hua he hi. <sup>20</sup> Ka ca chingpaw he bia, ‘Sae cawh a buipaw navy tah lai vy be,’ tahpaw khah a thui paria thlang my lo. Aa pa hreh caco, naaning zong aa ca hreh hrá he a. Ka cawngpahnah aa nge caco, naaning zong aa ca nge hrá he a. <sup>21</sup> Ka ming navai tah aa ca pasi aa ca pasa he a, zecawtamaw tatah aaning sahlo cawh a pa tawtupaw khah hnih bei he. <sup>22</sup> A vong lytah le bia ching lytah ung my he neh seh la, suanah cawh hnui a bei he. Ma duitei cawh atoheh cawh aa suanah khah a paphah khy bei he. <sup>23</sup> Kama a pa huapaw taco ka Paw zong khah a hua hrah. <sup>24</sup> Ahotahmai tah aa za tua bang lypaw khah aa hrong letah za tua lytah ung my neh seh la, suanah cawh hnui a bei he. Canghrasala ato lehei ma ningang chuipaw sahlo khah hmuh thlang he ka, ka Paw kha, Kama kha, kaa pahning tah aa ma hua he. <sup>25</sup> Canghrasala, ma heh aa phungbia letei ciapaw, ‘A silang ly pui tah aa pa hua thlang he,’<sup>☆</sup> tahpaw a tlingnah khah a cang.

---

☆ 15:25 Hlaw 35:19; 69:4



<sup>26</sup> Paw taitah a chuhpaw biahmuisui a kaitu Thlawpaw, ka Paw tei a va taw lepaw Singchingtu a va chua tih taco, kama ka kong khah a ca ching he a. <sup>27</sup> Naaning zong tah naa ching lai hra he a, zecawtamaw tatah athoning taitah Kama kha a ungpaw naa cang cawtah.

## 16

<sup>1</sup> Langpui naa pave ly nápwah ma vytei heh ka ca chingpaw he a cang. <sup>2</sup> Aaning sahlo taco synagog alailang aa ca papia he a. Naaning a ca theh pawhe sahlo tah Khazing rai kaa hrepaw a cang tatah aa rawh nápwah he cai a va chuh leimei myca. <sup>3</sup> Aaning sahlo taco ma hapaw hming cawh aa tua a, zecawtamaw tatah Paw zong Kama zong ma hnih bei he. <sup>4</sup> A cai a va chua tihtah a za ma ching thah tatah naa tah rua pawtah ma heh ka ca chingpaw he a cang. Athoning takhei co za ca ching bei neh, zecawtamaw tatah naaning kha ka ung thlang cawtah a cang.

### *Thlawpaw Pathai raihrenah*

<sup>5</sup> Atoheh cawh a pa tawtupaw kha ka sei myca a. Canghrasala, ‘Zelang maw na sei a?’ tatah aho tahmai tah pa hae tua hrah bei ceh, <sup>6</sup> zecawtamaw tatah ma hming sahlo heh ka ca chingnah caw he tahei naa nge a ca chia he. <sup>7</sup> Canghrasala biahmuisui ka ca ching he, Ka seipaw heh naa cawtah chah nápwah a cang. Sei lytah ung my neh seh la, Singchingtu cawh naaning kha a vong a be. Canghrasala ka sei caco, Ama cawh naaning kha ka va taw a. <sup>8</sup> A va chua tihtah khazaw cawngsaw sahlo khah suanah kong le dingnah kong le biacenah kong letah biahmuisui khah a

hnisah he a. <sup>9</sup> Suanah kong letah thaily a cang he a, zecawtamaw tatah kama aa pa zinglynah cawtah, <sup>10</sup> dingnah kong letah thaily a cang he a, zecawtamaw tatah Paw khatah sei a neh ka pa hmuh khy khaw a bei ceh. <sup>11</sup> Taico biacenah kong letah thaily a cang he a, zecawtamaw tatah khazaw uhtu bui cawh thaily cangsa a cang thah cawtah.

<sup>12</sup> Naaning kha rei ruapaw a hlupui ka hnui thlang naná teitah ato lehei co a cing kai khy bei ceh. <sup>13</sup> Canghrasala biahmuisui a kaitu Thlawpaw a va chua tih taco biahmuisui chunglang khah a ca nae khui he a. Ama a lungchuá tah rei a be, a thui paw khah rei ka, a va chuh lepaw kong khah a ca ching he a. <sup>14</sup> Kama ka tei a cang paw khah law ka, a ca hnisahnahpaw he takhei Kama rungnawnah khah a va chuakhui a. <sup>15</sup> Paw tei a hnuipaw vytei cawh ka tei a cang. Thlawpaw taco ka tei a cang paw tai khei law a ka, naaning khah a ca hnisá he, tatah ka za ca tahpaw he khah ma cawtah hei a cang.

<sup>16</sup> Cai acawngpe cawh pa hmuh khaw bei he ceh, mataico cai cawngpe letah naa pa hmuh kaw a.” tatah a tah.

*A hningzuitu sahlo lungsisawnah cawh lunglawngnah tah a tua a*

<sup>17</sup> A hningzuitu thaikhehpaw sahlo cawh pakheh le pakheh khah, “ ‘Cai acawngpe cawh pa hmuh khaw bei he ceh, mataico cai cawngpe letah naa pa hmuh kaw a,’ a tahpaw le, ‘Zecawtamaw tatah Paw kha ka sei a cawtah,’ a tahpaw heh zemaw a rei dupaw a cang?” tatah aa tah. <sup>18</sup> “Cai

acawngpe letah a tahpaw heh zemaw a rei du? A reipaw heh kaa thuihai tlung be,” tatah aa tah leimei.

<sup>19</sup> Zisu tah ma kong heh hae aa pa du takhah a hni. Macawtaco aa hai letah, “Cai acawngpe cawh pa hmuh khaw bei he ceh, mataico cai cawngpe letah naa pa hmuh kaw a ka tahpaw ka reidupaw khah maw pakheh le pakheh na hae leimei he ceh? <sup>20</sup> Biahmuisui ka ca ching he, khazaw a lawng chung tahei co, naaning cawh caw le sang tah naa ung he ceh, naa lungsi a sá a. Canghrasala naa lungsisawnah cawh lunglawngnah tah a cang tae a. <sup>21</sup> Ny a chaipaw canu cawh taithuinah a ing, zecawtamaw tatah ny a chai cai a phah cawtah. Canghrasala ny a chua khy taico a sawtei khazaw letei a za pipaw lunglawngnah thong khei, a taithuinah khah a monghly thlu. <sup>22</sup> Ma hraco na cang hrá he ceh: Atoheh cawh naa lungsisawnah cai a cang, canghrasala ca hmuh kaw he neh ka, na lawng he ceh, taico na lawngnah pawhe ceh cawh ahotahtmai ca chu khy a bei he. <sup>23</sup> Ma ning leco zehmai pa hae khawh bei ceh. Biahmuisui ka ca ching he, ka Paw tah ka ming tah naa haepaw maikaw khah a ca pae he a. <sup>24</sup> Ato tingtai lehei co ka ming tah zehmai hae bang bei he ceh. Hae la, hmuh a he ceh ka, na lawngnah pawhe ceh cawh a tling a.

<sup>25</sup> Tawchingnah bia tah ka za rei tei naná teitah ma hapaw bia cawh ka hmanh khawh ly nápw cai khah a va chuh myca a, ma tih taco ka Paw kong cawh a se pawtah ka ca ching he a. <sup>26</sup> Ma ning leco ka ming tah naa hae a. Paw khah naa vypaw tah ka hae a ka tahnah cang be. <sup>27</sup> Paw

Khazing hrahing tahei a ca do he, zecawtamaw tatah pa do he ceh ka, Khazing taitah ka vongpaw khah naa zing cawtah a cang. <sup>28</sup> Kama cawh Paw taitah khazaw lehei a vongpaw ka cang. Atoheh cawh khazaw heh piasai neh ka, Paw kha ka sei kaw myca a,” tatah a tah he.

<sup>29</sup> Mataico a hningzuitu sahlo takhei Zisu hai letah, “Atoheh cawh tawchingnah hmang lytah a sepaw tah na rei myca hi. <sup>30</sup> Nama tah zezongpui khah hnih ceh ka, haecakhia leimei a hy khawh bei ceh tah cawh atoheh kaa hni myca, ma tahei Khazing taitah na vong tahpaw khah a ma zingsah,” tatah aa tah.

<sup>31</sup> “Atoheh cawh naa zing myca!” tatah Zisu tah a chai he. <sup>32</sup> “Canghrasala naa ing lang cacy papaipatlaw naa cang nápaw cai va chuh a ka, a va phah myca. Kama longtei tah naa pa hua si a. Canghrasala kama longtei cang bei neh, zecawtamaw tatah ka Paw cawh kama kha a ung cawtah a cang.

<sup>33</sup> Kama letah thlawlungnah naa hnui khy nápawtah ma hming sahlo heh ka ca chingpaw he a cang. Ma khazaw lehei co, lung reithuinah naa hnui thlang a. Canghrasala, naa lung pacy my seh lo! Khazaw heh ka te thah hi,” tatah a tah he.

## 17

### *Zisu thlaw a chang*

<sup>1</sup> Zisu cawh ma bia a rei khy taico, avai lang a y ka, “Ka Paw, a cai a tling myca. Na Sawcapaw tahei ka ca parungnaw khy nápawtah na Sawcapaw heh parungnaw tua. <sup>2</sup> Zecawtamaw

tatah kama na pa pehpaw sahlo he khah chaizaw hringnah ka peh khy nápw he tah ming vytei cung letah nawhnuinah khah na pa peh myca. <sup>3</sup>Ma heh chaizaw hringnah cawh a cang, Khazing hmuisui pakheh, nama hni le nama tei na za tawpaw Zisu Khri hni heh a cang. <sup>4</sup>Ka tua ruapaw tei na pa pehpaw rai ka palingnah thong khei, aluicung letah na rungnawnah cawh ka langсах myca. <sup>5</sup>Taico ka Paw, khazaw pi hlai tei nama khatah ka za hnuipaw rungnawnah khakhei na hmekaw letah atoheh pa parungnaw tua.

*Zisu tah a hningzuitu sahlo cawtah thlaw a chang*

<sup>6</sup>Khazaw taihei y he ceh katei, Kama na pa pehpaw sahlo he khakhei Nama cawh kaa ca palang thah. Aaning sahlo cawh na tei a cang he. Kama khah pa pei he ceh ka, na rei khah aa ca nge. <sup>7</sup>Kama na pa pehpaw hming maikaw heh Nama taiteipaw a cang he takhah atoheh cawh aa hni myca. <sup>8</sup>Zecawtamaw tatah na pa pehpaw bia khah pei hrah he neh ka aa cyhlang. Nama taitah ka vong tahpaw khah a cang hrahing tah hnih he ka, na pa taw tahpaw khah aa zing. <sup>9</sup>Aaning aa cawtah hei thlaw ka chang. Khazaw cawtah chang bei neh, na pa pehpaw sahlo aa caw tutah ka changpaw a cang, zecawtamaw tatah aaning cawh na tei a cang he. <sup>10</sup>Ka hnuipaw vytei heh na tei cang he ka, na hnuipaw vytei khah ka tei a cang he. Taico aaning sahlo thong hei, rungnawnah cawh ka hmuh myca. <sup>11</sup>Khazaw lehei khua sy ung khaw bei neh, canghrasala aaning sahlo cawh aa ung thlang he a. Kama cawh Nama

kha ka vong a. A pathaipaw Paw, Nama le Kama pungkheh kaa cangpaw hratah pungkheh aa cang khy hrah nápwatá na ming, na pa pehpaw ming, hmingtuakhyná khei aaning sahlo heh rungvai my lo. <sup>12</sup> Aaning kha ka ung chung tahei co na pa pehpaw ming khei rungvai he neh ka, a bing teitah ka chia he. Capathai a tling nápwatá a rorang ruapaw sawtei a cangpaw khah tah ly co ahohmai a lydepaw ung bei he.

<sup>13</sup> Atoheh cawh Nama kha ka vong myca a, canghrasala khazaw letah ka ung chung tei ma hming sahlo ka reipaw heh ka lawngnah reite lypaw khah aa chung letah aa hnui khy nápwatá a cang. <sup>14</sup> Aaning sahlo cawh na bia khah ching thah he neh ka, khazaw tahei a hua he, ze-cawtamaw tatah khazaw leteipaw ka cang lypaw hratah khazaw leteipaw aa cang lynah cawtah a cang. <sup>15</sup> Ka thlawchangnah cawh aaning sahlo heh khazaw taihei law thlang he, tahpaw cang lytah mehchaw lypaw taitah vai my lo, tah tu heh a cang. <sup>16</sup> Kama heh khazaw tei ka cang lypaw hratah aaning sahlo heh khazaw tei cang hrah bei he. <sup>17</sup> Biahmuisui khei aaning sahlo heh pathaisah my lo: Na bia cawh biahmuisui a cang. <sup>18</sup> Nama tah khazaw lehei na pa tawpaw hratah Kama tah aaning sahlo heh khazaw lehei ka taw hrá he. <sup>19</sup> Aaning zong hmuisui teitah pathaisah aa cang khy nápwatá aa cawtah Kama teitah ka pathai sahpaw a cang.

*Zisu tah zingtu vytei cawtah thlaw a chang*

<sup>20</sup> Ka thlawchangnah heh aaning sahlo aa caw duitei tah cang be. Aaning sahlo aa bia thong

tei a pa zing lepaw sahlo aa caw zong tah ka chang, <sup>21</sup> ka Paw, Nama cawh ka chung letah ung ceh ka, na chung letah ka ungpaw hratah aaning vytei pungkheh aa cang khy hrah nápwaw cawtah a cang. Kama cawh Nama tah na pa taw tahpaw heh khazaw tah a zing khy nápwaw cawtah le kaa chung letah aa ung khy hrah nápwaw zong tah a cang. <sup>22</sup> Nama le Kama pungkheh kaa cangpaw hratah pungkheh aa cang khy hrah nápwaw cawtah na pa pehpaw rungnawnah khah aaning cawh ka peh he. <sup>23</sup> Aaning aa chung letah ung neh ka, Kama ka chung letah na ung. Nama tah na pa taw tahpaw khah le na pa dopaw hratah aaning sahlo heh na do hrah he takhah khazaw hni sá pawtah aaning sahlo heh a tlangtlingpaw a pungkhehnah letah chuakhui khy hrah ruapaw he tah a cang.

<sup>24</sup> Ka Paw, Nama tei na pa pehpaw sahlo he heh ka ungnah letah Kama kha ung hrah he seh la, ka rungnawnah Nama tei na pa pehpaw khah hmuh he seh tah ka du. Zecawtamaw tatah khazaw na papi hlai taitah Nama tah na pa dopaw a cang.

<sup>25</sup> A dingpaw ka Paw, khazaw tah a ca hni ly tahmai Kama taco ca hnih thlang neh ka, Nama tah na pa taw tahpaw khah aaning sahlo taco aa hni thlang. <sup>26</sup> Ka caw tei na hnuipaw donah khah aa chung letah a ung khy nápwawtah le kama hrahring tei aa chung letah ka ung khy nápwaw tahei na kong khah hnisah he neh ka, ka hnisah vy leimei he a,” tatah thlaw a chang.

## 18

*Zisu aa tle*

*(Mt 26:47-56; Mk 14:43-50; Luk 22:47-53)*

<sup>1</sup> Thlaw a changpaw a pachang taico, Zisu cawh a hningzuitu sahlo khatah piathlah he ka, Kidron saiho rae lang aa va sei. Ma langchang co, Oliv thingthi buichung ung ka, ma chunglang khah Ama le a hningzuitu sahlo cawh a nae he.

<sup>2</sup> Ma leco Zisu le a hningzuitu sahlo khah a tong pahmo tei caw he tah Ama a luitupaw Judas takhei ma hminghmaw cawh a hni. <sup>3</sup> Macawtaco Judas cawh tlangbui macang sahlo le Farasi sahlo tah aa siapaw he raekeh phukheh le abui macang sahlo khah a va chui he ka, buichung lang cawh a vong he. Myrei le me-ing le hrainang sahlo a va tle he.

<sup>4</sup> A cung letah hming a tlung lepaw a hnih thlu thahpaw Zisu cawh piathlah ka, aaning sahlo khah, “Naa huipaw cawngsaw cawh ahomaw a cang?” tatah a va hae he.

<sup>5</sup> Aaning sahlo taco, “Nazaret Zisu,” tatah aa palei.

Zisu taco, “Ama cawh kama heh ka cang hi!” tatah a tah he. Taico aaning sahlo khaco a luitupaw Judas khah a daw thlang hrah. <sup>6</sup> Zisu tah, “Ama cawh kama heh ka cang hi!” tatah a tah tihtah, aa hninglang a thai he ka, alui letah a pohly he.

<sup>7</sup> Zisu taco aaning sahlo cawh, “Naa huipaw cawngsaw cawh ahomaw a cang?” tatah a hae vy he.

Taico aaning sahlo taco, “Nazaret Zisu,” tatah aa tah.

<sup>8</sup> Zisu taco, “Ama cawh Kama heh ka cang hi, tatah ka ca tah thah he. Kama naa pa huipaw tei a cang caco, ma tlaw heh cawh sei sa o,” tatah a chai he. <sup>9</sup> Ma hrarei hming a va ungpaw heh, “Na



pa pehpaw he sahlo lekhei pakheh hmai hly bei neh,” tatah a za reipaw bia tlingnah cawtah khei a cang.

<sup>10</sup> Mataico zyzi a kaipaw Simon Piter takhei zyzi cawh a phe ka, tlangbui alaicaipaw a saecapaw a cacang lang naw khah tuh ka, a pathai thlah. Ma saecapaw a ming cawh Malkhas a cang.

<sup>11</sup> Zisu taco Piter khah, “Na zyzi cawh a kawng lang sang kaw! Paw tah a pa pehpaw ny heh ding lytah maw ka ung a?” tatah a tah.

*Anas khatah Zisu aa seikhui  
(Mt 26:57-58; Mk 14:53-54; Luk 22:54)*

<sup>12</sup> Mataico raekeh phukheh le raekeh hotu le Juda cawngsaw abui macang sahlo taco Zisu cawh tle he ka, tongchai he ka, <sup>13</sup> ma kung letei tlangbui alaicaipaw Kaiafa a nupuino a paw Anas khakhei aa seikhui taw. <sup>14</sup> Kaiafa cawh zawpui cawtah pakheh thih cawh a chah vy a, tatei Juda cawngsaw sahlo rawhnah a peitu he khah a cang.

*Piter a uikheh a paphahsainah  
(Mt 26:69-70; Mk 14:66-68; Luk 22:55-57)*

<sup>15</sup> Simon Piter le ahringpaw a hningzuitu takhei Zisu cawh aa zuilai. Zecawtamaw tatah ma letei a hningzuitu heh tlangbui alaicaipaw kha a hnihpaw cang he ka, Zisu khaco tlangbui alaicaipaw a ingdung chunglang cawh a nae hrah. <sup>16</sup> Canghrasala Piter tu cawh hawkaw khungthing lang lekhei a daw thlang. Tlangbui alaicaipaw khatah a hnih pawhe ahringpaw a hningzuitu cawh a vong kaw ka, ma letei hawkaw a heh no canuno khah ching ka, Piter khah a za naekhui.

<sup>17</sup> Hawkaw a heh no canuno taco Piter cawh, “Ma cawngsawpaw a hningzuitu heh cang thlang hrah bei ceh maw?” tatah a hae.

Piter taco, “Cang bei neh,” tatah a palei.

<sup>18</sup> Cakaw ngetei ka, sae sahlo le abui macang sahlo cawh ma lung naa seh tatah me khah a ai thlang he. Piter zong tah palung na seh tah ka, aaning sahlo khaco a daw thlang hrah.

*Tlangbui alaicaipaw takhei Zisu bia a hae  
(Mt 26:59-66; Mk 14:55-64; Luk 22:66-71)*

<sup>19</sup> Ma chung lekhei tlangbui alaicaipaw taco Zisu cawh a hningzuitu sahlo aa kong le a cawng-pahnah kong khah a hae.

<sup>20</sup> Zisu taco, “Langhai tah pui khazaw kha ka rei thlang caw. Juda cawngsaw sahlo a pahmonah-paw he synagog a cang ly leh behnah ing letah ka cawngpah tei he. Aparuh teitah zehmai rei bang bei neh. <sup>21</sup> Zecawtamaw kama cawh na pa hae? Ka bia a thui-paw sahlo khah va hae thlang o. Ka reipaw khah aa hni thlu thlang kho,” tatah a palei.

<sup>22</sup> Zisu tah, ma hrakhei a chai tihtah a kae letei a ungpaw abui macang pakheh takhei a hme letah a cabai. “Ma hrakhei tlangbui alaicaipaw chai phung a cang maw?” tatah a tah.

<sup>23</sup> Zisu taco, “Ka reipaw ahmang ly caco, ah-mang lynah cawh palang thlang. Canghrasala ah-mangpaw ka rei caco, zecawtamaw na pa cabai?” tatah a palei. <sup>24</sup> Mataico, Anas taco tongchai hmo khei tlangbui alaicaipaw Kaiafa khatah a seisah khui he.

*Piter tei a uihningnah le a uithungnah a paphah-sainah*

*(Mt 26:71-75; Mk 14:69-72; Luk 22:58-62)*

<sup>25</sup> Simon Piter cawh a daw hmo tei me a ai ning takhei, “Ma cawngsawpaw a hningzuitu heh cang hrahing thlang bei ceh maw?” tatah aa hae.

“Cang bei neh,” tatah a paphah.

<sup>26</sup> Tlangbui alaicaipaw a sae sahlo letei pakheh, Piter tah a naw a pathai thlahpaw khatei sawny a cangpaw cawngsawpaw takhei, “Ama khatah pui Oliv thingthi buichung letah ka ca hmuh thlang kha!” tatah a tah. <sup>27</sup> Piter taco a paphah vy ka, ma leco aa cawh a khawngpai.

*Pilat hme letah Zisu*

*(Mt 27:1-2, 11-14; Mk 15:1-5; Luk 23:1-5)*

<sup>28</sup> Mataico, Juda cawngsaw sahlo takhei Zisu cawh Kaiafa a ing taikhei Rom cawngsaw uhtubui ing lang khah aa seikhui. Ma cawh mongdi tah cang ka, Juda cawngsaw sahlo cawh uhtubui ing lang khah a nae bei he. Phunglang hratah pathai-lynah khah cahri tah Khungsai Panawnah zairia khah e aa du cawtah a cang. <sup>29</sup> Macawtaco Pilat khah ka pia ka, aaning sahlo cawh, “Ma cawngsawpaw heh ze suanah maw naa pu?” tatah a hae he.

<sup>30</sup> “Ma cawngsawpaw heh suanah a tuapaw a cang ly caco, nama khatah kaa va chuakhui a maw?” tatah aa palei.

<sup>31</sup> Pilat taco, “Seikhui la, naa phungbia hrakhei naaning tah bia va pace thlang o,” tatah a tah he.

Juda cawngsaw sahlo taco, “Kaaning cawh ahohmai thawkhynah naw kaa hnui bei ceh saw,” tatah aa tah. <sup>32</sup> Ma hming a va ungpaw heh a thih

nápaw kong letah zekhatah phing tamaw a thih a tahpaw khah Zisu tei a za reipaw a tlingnah a cang.

<sup>33</sup> Mataico Pilat cawh a ing chunglang a nae kaw ka, Zisu cawh ysah he ka, a hai letah, “Juda cawngsaw aa siangpahrang cawh na cang maw?” tatah a hae.

<sup>34</sup> Zisu taco Pilat cawh, “Ma bia cawh nama na lungchua maw, a cang ly leh male tah ka kong aa ca chingpaw maw?” tatah a hae.

<sup>35</sup> Pilat taco, “Kama heh Juda cawngsaw a cang tatah na parawh maw? Kama khatah a va ca chuakhuipaw he heh na cawngsaw le nama na tlangbui macang sahlo a cang he hi. Zeky maw na tua?” tatah a palei.

<sup>36</sup> Zisu taco, “Kama ka painah raang cawh ma khazaw lehei cang be. Ma khazaw heh cang my seh la, Juda cawngsaw sahlo tah aa pa tle ly nápawtah ka raihretu sahlo tah aa dy thlang hrá he a. Canghrasala kama ka painah raang cawh ma khazaw raang lehei cang be,” tatah a tah.

<sup>37</sup> A cang caco, “Siangpahrang na cang maw?” tatah Pilat taco a tah.

Zisu taco, “Na reipaw cawh ahmang, siangpahrang ka cang. A ngetei tahpaw co, ma khazaw letei ka pinah chang le ka va chuanah chang cawh biahmuisui palang rua pawtah a cang. Biahmuisuipaw letei a ungpaw maikaw taco ka rei aa nge,” tatah a chai.

<sup>38</sup> Pilat taco, “Biahmuisui cawh zemaw?” tatah a hae. Taico Juda cawngsaw sahlo khaco pia kaw ka, “Kama cawh ma cawngsawpaw lehei ze suanah hmai hmuh bei neh. <sup>39</sup> Canghrasala

Khungσαι Panawnah cai lehei thongtlah pakheh thlawpah heh naa phung cang ka, 'Juda cawngsaw aa siangpahrang,' heh ma thlawpah seh tah naa du maw?" tatah a tah he.

<sup>40</sup> Aaning sahlo taco, "Ama cawh ma thlawpah kheh! Baraba khah ma thlawpah!" tatah aa yso. Baraba cawh damia a cang.

## 19

*Zisu cawh khaipai rua pawtah bia aa chaw  
(Mt 27:15-31; Mk 15:6-20; Luk 23:13-25)*

<sup>1</sup> Mataico Pilat tah Zisu cawh tlesah he ka, a cheisah he. <sup>2</sup> Raekeh sahlo takhei ahling lukhu khah phia he ka, a lu letah a khusah he. Pai saidungpaw khah a buhsah he ka, <sup>3</sup> ato le ato tah a vawhno he ka, "Juda cawngsaw aa siangpahrang cawh a hringkhua sy ky seh," tatah aa tah. Taico a hme letah aa cabai.

<sup>4</sup> Pilat cawh ka pia kaw hui ka, Juda cawngsaw sahlo cawh, "Mingtua o, kama cawh a suanah konglang hmuh bei neh tah hnisah du tah ma cawngsawpaw heh kaa ka piakhuipaw a cang hi," tatah a tah he. <sup>5</sup> Zisu cawh ahling lukhu kha, a pai saidungpaw kha, a ka pia tihtah Pilat taco aa hai letah, "Ma cawngsawpaw heh a cang hi," tatah a tah.

<sup>6</sup> Tlangbui macang sahlo le abui macang sahlo takhei aa hmuh cangkawleh, "Khraws letah khaipai! Khraws letah khaipai!" tatah a y he.

Canghrasala Pilat taco, "Naaning tah seikhui la, khaipai o. Kama cawh a suanah hmuh bei neh," tatah a chai he.

<sup>7</sup> Juda cawngsaw sahlo taco, “Phungbia hnui peh ka, kaa phungbia naning co ama cawh thih tlang a tlah, zecawtamaw tatah Khazing Sawcawpaw ka cang a tah navai tah,” tatah aa tah.

<sup>8</sup> Ma bia cawh Pilat tah a thui tihtah a thlawzawng lo leimei ka, <sup>9</sup> abui ing chunglang cawh a nae kaw. Zisu cawh, “Zelang tamaw na va chua?” tatah a hae, canghrasala Zisu tah zehmai palei be. <sup>10</sup> “Bia pa chai du bei ceh maw? Nama thlaw khynah le khaipai khynah hmingtuakhynah ka hnuipaw heh hnih bei ceh maw?” tatah Pilat taco a tah.

<sup>11</sup> Zisu taco, “Cung lang Khazing taitah peh na cang ly caco, ka cung letah hmingtuakhynah hnui bei ceh. Macawtaco, nama khatei a pa phah sawpaw cawngsaw heh alai vypaw suanah a tuapaw cawh a cang,” tatah a chai.

<sup>12</sup> Mataico Pilat takhei Zisu lua sápw khah a zawng, canghrasala Juda cawngsaw sahlo takhei, “Ma cawngsaw khah na thlaw caco, nama cawh Sizar a vesaw cang bei ceh. Siangpahrang ka cang a tahpaw maikaw cawh Sizar a caraepaw a cang he,” tatah a y tima he.

<sup>13</sup> Ma cawh Pilat tah a thui tihtah Zisu cawh ka piakhui ka, alung dopaw siasang (Ma cawh Aramaik rei co, “Gabatha,” tatah aa tah) letei biacengah dyching lekhei a ty. <sup>14</sup> Ma heh Khungsai Panawnah za, pachiapaningnah ning, ningching hrawng lekhei a cang.

Pilat tah Juda cawngsaw sahlo hai letah, “Ma heh naa siangpahrang a cang hi,” a tah he.

<sup>15</sup> Canghrasala, aaning sahlo taco, “Sei hly khui o! Seihly khui la, khraws letah khaipai thlang ky!” tatah aa y.

Pilat taco, “Naa siangpahrang cawh ka khaipai thlang maw?” tatah a hae hri he.

“Sizar tah ly co siangpahrang hnui bei peh,” tatah tlangbui macang sahlo tah aa chai.

<sup>16</sup> A hning taco, Pilat tah khraws letah khaipai pawtah khei Zisu cawh aa kih letah a hlai he. Macawtaco raekeh sahlo takhei law he ka, aa seikhui.

*Zisu thawnah*

*(Mt 27:32-44; Mk 15:21-32; Luk 23:26-43)*

<sup>17</sup> A khraws khah pulai ka, Luru hming (ma cawh Aramaik rei tah, “Galgotha,” tatah aa tah) lang khah a sei. <sup>18</sup> Ma leco khaipai he ka, Ama khaco cawngsaw pahning, pakheh khah a rakheh lang, pakhehpaw khah a rakheh lang khei Zisu khah a le letah aa thlah.

<sup>19</sup> Pilat takhei ca ciasah he ka, khraws lekhei a ta. Ma ca cawh, “NAZARET ZISU, JUDA CAWNGSAW AA SIANGPAHRANG A CANG,” tah heh a cang. <sup>20</sup> Juda cawngsaw mehlupui tah ma ca cawh aa rei, zecawtamaw tatah Zisu aa khaipainah hminghmaw cawh khuapui khatah a ne ka, ca cawh Aramaik, Latin le Grik rei tah aa cianah cawtah khei. <sup>21</sup> Juda cawngsaw tlangbui macang sahlo taco, Pilat khah, “‘Juda cawngsaw aa Siangpahrang,’ tatah cia kheh ma cawngsawpaw tahei, ‘Juda cawngsaw aa Siangpahrang ka cang, a tah,’ tatah cia hri,” tatah aa va tah.

<sup>22</sup> Pilat taco, “Ka cia cápaw cawh ka cia cápaw a cang thlang,” tatah a chai he.

<sup>23</sup> Raekeh sahlo tah Zisu cawh aa khaipai tihtah a chaichi khah pahlū pah he ka, chykheh cy long ting rua pawtah khei chypali tah aa chy. A angki rai tu cawh chy bei he. Angki rai cawh a zung lypaw, a rong taitah a dong tai tawpaw a cang.

<sup>24</sup> Raekeh sahlo taco pakheh le pakheh khah, “Ma heh cawh ky chy bei he peh. Ahomaw a ting a tahpaw khah basung kaa phe thlang a,” aa tah.

Ma hming a ungpaw heh Capathai tei:

“Aaning sahlo taco ka angki khah a chaichy he ka, ka chaichi khah basung tah aa phe,”<sup>☆</sup>

tahpaw a tling ná pawtah khei a cang. Macawtaco raekeh sahlo tah ma heh aa tuapaw a cang.

<sup>25</sup> Zisu a khraws kae leco a no, a no a unyno, Klopa a nupuino Mari le Mari Makdalin khah a daw thlang he. <sup>26</sup> Ma letei a no a daw thlang katei, a dopaw a hningzuitu tah a kae letah a dawpai thlangpaw khah Zisu tah a hmuh tihtah a no hai leco, “Canuno, na sawcapaw kho,” tatah tah ka, <sup>27</sup> a hningzuitu cawh, “Na no kho,” tatah a tah. Ma khy taco a hningzuitu taco ma cawngsawno cawh a ing lang a chui.

### *Zisu thihnah*

*(Mt 27:45-56; Mk 15:33-41; Luk 23:44-49)*

<sup>28</sup> Ma khy taico atoheh zezong a tling thlu myca takhah hnih ka, Capathai a tling ná pawtah khei, “Ka tui a hrae,” tatah a tah. <sup>29</sup> Ma leco misur zu a thobahlapaw beirai sangkheh a ung. Ma chunglang cawh span khah nong he ka, rahtlong letah tongpai he ka, calia he ka, Zisu a hmo leco aa hne. <sup>30</sup> Zisu tah misurhang a thobahlapaw cawh

---

<sup>☆</sup> **19:24** Hlaw 22:18



a pazo khy taitah, “A tling myca,” tatah a tah khy taitah a lu cawh alui lang a khuh ka, a thi.

<sup>31</sup> Ma heh Pachiapaningnah Ning tah cang ka, a ningthlamong cawh Panawnah Sabat ning a cang. Macawtaco Juda cawngsaw sahlo taco Sabat ning tei khraws letah rawh sahlo a pathle thlang-paw khah aa dulynah cawtah aa phe va thlia tah aa rawh lahthlá pawtah khei Pilat khah aa hae. <sup>32</sup> Macawtaco raekeh sahlo khah a vaw he ka, Zisu khatei aa khaipai hruipaw he letei pakhehpaw a phe khah thleh he ka, mataico ahringpaw pakhehpaw a phe khah aa thlia vy. <sup>33</sup> Canghrasala Zisu kha a vaw tih he tah a thih thahpaw khah hmuh he ka, a phe khah thleh bei he. <sup>34</sup> Raekeh chung taikhei pakhehpaw tah Zisu a kang lekhei khaw-sui tah dong ka, thi le tui cawh a ka pia palang he. <sup>35</sup> Ma a hmuhpaw cawngsawpaw taco rei ka, a reipaw cawh biahmuisui a cang. Biahmuisui ka rei takhah hnih ka, a reipaw cawh naaning sahlo zong tah naa zing khy hrah nápwaw cawtah a cang. <sup>36</sup> Ma hming sahlo a va ungpaw heh, “Ama a ru cawh rukheh hmai thlia cang be,”<sup>✧</sup> tahpaw Capathai bia le, <sup>37</sup> ahringpaw Capathai letei, “Aaning tei aa dongpaw cawngsawpaw khah aa ming a,”<sup>✧</sup> tahpaw bia a tlingnápwaw cawtah a cang.

### *Zisu phungnah*

*(Mt 27:57-61; Mk 15:42-47; Luk 23:50-56)*

<sup>38</sup> Ma khy taico Arimathea khuapaw Josef takhei Zisu rawh cawh Pilat khah a hae. Josef cawh Zisu a hningzuitu pakheh a cang hrah, canghrasala

✧ **19:36** Piachua 12:46; Mehlu 9:12; Hlaw 34:20    ✧ **19:37** Zeka 12:10

aparuh teitah a cang. Zecawtamaw tatah Juda cawngsaw sahlo khah a ci he. Pilat nawtlah khui ná khei Josef cawh a vaw ka, Zisu rawh cawh a va lah. <sup>39</sup> Josef khaco, khahlai tei zai tah Zisu a va vepaw cawngsawpaw Nikodema khah a sei hrah. Nikodema tah ny zakheh le songngaw hrong a rihpaw ringthopaw, mura le aloi pahlawhpaw khah a tle lai. <sup>40</sup> Ma tlaw pahning taco Zisu rawh cawh law he ka, ringthopaw khakhei paithladih anaipaw tah aa pahlong. Ma heh Juda cawngsaw sahlo a phungnah he aa phunglang a cang. <sup>41</sup> Zisu aa khaipainah hminghmaw leco, buichung ung ka, ma buichung leco ahohmai a phung naw bang lynah pawhe athlai thapaw sangkheh a ung. <sup>42</sup> Ma ning heh Juda cawngsaw sahlo tah Sabat cawtah pachianah ning a cang hlui tah athlai zong cawh a ne caw takhei, ma leco Zisu cawh aa phungpaw a cang.

## 20

### *Thlai a long*

*(Mt 28:1-10; Mk 16:1-8; Luk 24:1-12)*

<sup>1</sup> Zaa kheh letei ning hmetaw caipaw mongdi khuahme a se hlai takhei, Mari Makdalin cawh thlai lang khah va sei ka, thlaikaw taitah alung a hneihly thapaw khah a hmu. <sup>2</sup> Macawtaco Simon Piter le Zisu tei a dopaw ahringpaw a hningzuitu khakhei va sai tlamang ka, “Thlai taikhei Abuipaw khah law he ka, zeletamaw aa chia thapaw hnih bei neh!” tatah a tah he.

<sup>3</sup> Macawtaco Piter le ahringpaw a hningzuitu cawh thlai lang khah aa sei. <sup>4</sup> Aa pahning co sai he ka, canghrasala ahringpaw a hningzuitu

takhei Piter cawh cakhai ka, thlai cawh a va phah taw. <sup>5</sup> A bung ka, a chunglang cawh va ming ka, ma letei a lia thlangpaw paithladih khah a va hmuh, canghrasala a chunglang cawh a va nae be. <sup>6</sup> Mataico a hning khapaw Simon Piter khah va phah ka, thlai chunglang cawh a nae. Ma letei a lia thlangpaw paithladih khah a hmuh. <sup>7</sup> Zisu a lu aa pahlongnahpaw paithladih zong khah a hmuh pai. Ma pai cawh a tongkaling ka, paithladih taikhei a macang tah a ung. <sup>8</sup> A hning taco, thlai a va phah tawpaw ahringpaw a hningzuitu zong cawh a chunglang a nae hrah ka, hmuh ka, a zing. <sup>9</sup> Zisu cawh thihnah taitah a tho kaw a tahpaw Capathai bia khah thuithai ting bei he.

*Mari Makdalin khatah Zisu a paly  
(Mk 16:9-11)*

<sup>10</sup> Mataico a hningzuitu sahlo cawh ing lang khah a dih kaw he. <sup>11</sup> Canghrasala, Mari cawh thlai alailang khei a daw thlang ka, a cah leimei. A caw hmo khei a bung ka, thlai chunglang khah za ming ka, <sup>12</sup> pai rang a buhpaw vaiming pahning cawh Zisu rawh aa isahnah lekhei pakheh a lu lang, pakheh a phe lang a ty thlangpaw he khah a hmuh.

<sup>13</sup> Aaning taco ama cawh, “Cawngsawno, ze-cawtamaw na caw leimei?” tatah aa hae.

Mari taco, “Ka Buipaw a rawh law he ka, zeletamaw aa chia tahpaw hnih bei neh,” tatah a tah he. <sup>14</sup> Ma hratei a tah khy taico a paleh ka, Zisu a daw thlangpaw khah a hmuh, canghrasala Zisu a cang tahpaw hnih be.

15 Ma cawngsawpaw taco, “Cawngsawno, zecawtamaw na caw leimei? Na huilaipaw cawngsaw cawh ahomaw a cang?” tatah a tah.

Mari taco ama cawh buichung a hnuitupaw a cang rua tah ka, “Ka pu, nama tah na lah caco, zeletamaw na chia tahpaw pa ching theh ky, va law kaw ná neh seh,” tatah a tah.

16 Zisu taco ma cawngsawno cawh, “Mari,” tatah a tah.

Ama lang cawh a paleh ka, Aramaik rei tah, “Raboni,” (ma a silang cawh cawngpahtu tahnah a cang) tatah a chai.

17 Zisu taco cawngsawno cawh, “Patle thlang kheh, zecawtamaw tatah Paw khatah kechy balang bei neh; canghrasala ka uny sahlo khatah va sei la, ‘Ka Paw le naa Paw, ka Khazing le naa Khazing khatah ka kechy myca a, a tah,’ tatah va ching hri o,” a tah.

18 Mari Makdalin cawh a hningzuitu sahlo khaco va sei ka, “Abuipaw ka hmuh! Ma sahlo heh a pa ching,” tatah thongpang a va thuisah he.

*Zisu a hningzuitu sahlo khatah a paly  
(Mt 28:16-20; Mk 16:14-18; Luk 24:36-49)*

19 Zaa kheh letei ning hmetaw caipaw a cangpaw, ma ning zailang letei Juda cawngsaw sahlo ci tah ingkaw hraí tei a hningzuitu sahlo a pahmoning he takhei, Zisu cawh a vong ka, aa hrong leco a daw ka, “Naaning khatah thlawlungnah ung ky seh!” a tah he. 20 Ma bia a rei khy taikhei a kih le a kang khah a hmuhsah he. Abuipaw cawh aa hmuh tihtah a hningzuitu sahlo cawh a lawng ngetei he.

<sup>21</sup> Zisu taco, “Naaning khatah thlawlungnah ung ky seh! Paw tah a pa tawpaw hratah kama tah ka ca taw hrah he,” tatah a tah vy he. <sup>22</sup> Taico ma bia a rei khy taikhei a hu suaso he ka, “Thlawpaw Pathai hnui o. <sup>23</sup> Ahohmai aa suanah sahlo khah naa ngethai caco he, ngethai a cang thlang he a. Naa ngethai ly caco he, ngethai cang bei he,” tatah a tah.

*Thomas khatah Zisu a lang*

<sup>24</sup> Hluhning letah pakheh a cang hrahpaw Thomas (Didama\* aa tahpaw) cawh Zisu a vongning takhei a hningzuitu sahlo khatah ung be. <sup>25</sup> Ahringpaw a hningzuitu sahlo takhei Abuipaw kaa hmuh tatah aa ching tihtah Thomas taco, “A kih letei thawkhainah hmaw ka hmuh ly leh ka kihdong tah ka hre ly le a kaang hmaw ka po ly caco, naa reipaw cawh zing bei neh,” tatah a tah he.

<sup>26</sup> Zaakheh khy takhei, a hningzuitu sahlo cawh ing letah a pahmo kaw hui he ka, aaning sahlo khaco Thomas cawh a ung hrah. Ingkha aa hrai thlang naná teitah Zisu cawh a za nae ka, aa hrong leco a daw ka, “Naaning khatah thlawlungnah ung ky seh,” tatah a tah he. <sup>27</sup> Zisu tah Thomas cawh, “Ka kih heh ming la, va hre tua. Na kih cawh chua la, ka kaang heh va po tua. Lung langlo tah ung kheh, zing myca,” tatah a tah.

<sup>28</sup> Thomas taco a hai letah, “Ka Buipaw le ka Khazing!” tatah a tah.

<sup>29</sup> Mataico Zisu taco Thomas cawh, “Nama cawh na pa hmuh cawtah na pa zing; pa hmuh ly tei a pa

---

\* **20:24** Didama cawh mehphia tahnah a cang.

zingpaw sahlo cawh bonghnang song a cang he a,” tatah a ching.

<sup>30</sup> Zisu tah a hningzuitu sahlo hme letah paching pakhanah a hlupui tua ka, ma cabu lehei cia lypaw ningang chuipaw paching pakhanah a hlupui a ung. <sup>31</sup> Canghrasala Zisu cawh Khri, Khazing Sawcapaw a cang tah naa zing tei, ma zingnah thong co a ming letah hringnah naa hnui khy nápwatma ma sahlo heh cia a cang he.

## 21

### *Zisu le ningang chuipaw ngawtlenah*

<sup>1</sup> Ma khy taico Zisu cawh Tiberia rili kae lekhei a hningzuitu sahlo khatah a paly vy. A paly-nah ningcang cawh ma hrahei a cang. <sup>2</sup> Simon Piter, Thomas (Didama aa tahpaw), Galili raang Kana khuapaw Nathaniel, Zebedi a sawcapaw leh le ahringpaw hningzuitu pahning sahlo cawh hmokkeh letah a ung he. <sup>3</sup> Simon Piter takhei, “Ngaw tle tah ka sei a,” tatah tah he ka, aaning sahlo taco, “Nama kha ka sei hra peh,” tatah aa tah. Macawtaco tuilawng cawh ke he ka, aa sei, canghrasala ma zai cawh ngaw sangkkeh hmai tle bei he.

<sup>4</sup> Mongdi taco Zisu cawh ngaekang lekhei a daw thlang, canghrasala a hningzuitu sahlo taco ma kheh Zisu a cang tahpaw bi bei he.

<sup>5</sup> Zisu taco, “Vesaw sahlo, ngaw naa tle bang maw?” tatah a tah he.

Aaning sahlo taco, “Tle bang bei peh,” tatah aa chai.

<sup>6</sup> Zisu taco, “Naa so khah lawng a cacang langchang lekhei va la, naa tle thlang a,” a tah

he. Aa va tihtah aa so khah hrui khy bei he, zecawtamaw tatah ngaw a hlupui a o cawtah a cang.

<sup>7</sup> Mataico Zisu tei a dopaw a hningzuitu takhei Piter cawh, “Abuipaw a cang!” tatah a tah. “Abuipaw a cang,” a tahpaw khah Simon Piter taco a thui cangkawleh a pai khah a pazai (a pai khah a za hlehly thah) ka, tui chunglang cawh a zythlah. <sup>8</sup> Ahringpaw a hningzuitu sahlo taco tuilawng khei aa zui. Ngaw a chih thlangpaw aso khah aa hrui pai lai, zecawtamaw tatah aa ungnah cawh ngaekang taikhei a hlah be, pei zathung hrawng longlong a hlah. <sup>9</sup> Ngaekang cawh aa phah tihtah me tua he katei, ngaw pakang thlangpaw le, very a cawngpe khah aa hmuh.

<sup>10</sup> Zisu taco aa hai letah, “Ngaw naa tlepaw khah a cawngpe tah va tle bang tua o,” a tah he.

<sup>11</sup> Simon Piter cawh tuilawng cung lang ke ka, aso khah ngaekang lang a hrui. Ngaw alaipaw (153) a awh, canghrasala, ngaw ma tluá co a hlu thlang naná teitah aso cawh a hriachy be. <sup>12</sup> Zisu taco aa hai letah, “A vong la, batui va e o,” a tah he. A hningzuitu ahotahmai tah, “Ahomaw na cang?” tatah hae ngang bei he. Abuipaw a cang takhah aa hni thlang. <sup>13</sup> Zisu cawh a vong ka, very cawh law ka, aaning sahlo cawh pei he ka, ma hraco ngaw zong khah a peh hrah he. <sup>14</sup> Ma heh thihnah taitah a tho kaw khy taitah a hningzuitu sahlo khatah Zisu a uithungnah a palynah a cang.

*Zisu tah Piter a padawchy kaw*

<sup>15</sup> Batui aa e khy taico Zisu tah Simon Piter cawh, “Johan a sawcapaw Simon, ma sahlo navy hei na pa do vy hmuisui maw?” tatah a tah.

Simon taco, “A cang, Abuipaw, ka ca dopaw cawh na hni,” tatah a tah.

Zisu taco, “Ka tuu teitei sahlo khah aa lawh pei my lo,” tatah a tah.

<sup>16</sup> Zisu taco, “Johan a sawcapaw Simon, Na pa do hmuisui maw?” tatah a tah.

Simon taco, “A cang, Abuipaw, ka ca dopaw cawh na hni,” tatah a chai.

Zisu taco, “Ka tuu sahlo khah mingkai my lo,” tatah a tah.

<sup>17</sup> A uithungnah leco, “Johan a sawcapaw Simon, na pa do maw?” tatah a tah.

Piter cawh Zisu tah uithung tai, “Na pa do maw?” tatah a haenah cawtah kheh a lung a sah ka, “Abuipaw, nama tah zezong vytei na hni; ka ca dopaw zong na hni,” tatah a tah.

Zisu taco, “Ka tuu sahlo khah lawh pei my lo.

<sup>18</sup> Biahmuisui ka ca ching, na nyheh ning taco nama teitah caise a tua ceh ka, na dunah lang khah na sei. Canghrasala na macang tih taco, na kih pazylai a ceh ka, ming hringpaw tah chaichi a ca tua sa he ka, na sei dulynah lang khah aa ca hrui lai a,” tatah a tah. <sup>19</sup> Zisu tah ma bia a reipaw heh Piter cawh ze hra tamaw thi a ka, Khazing khah a rungnaw sa a, takhah a rei hnohnangpaw a cang. Mataico a hai letah, “Va pazui!” tatah a tah.

<sup>20</sup> Piter cawh a paleh ka, Zisu tei a dopaw a hningzuitu tei a va zuilaipaw he khah a hmuh. Ma cawngsawpaw heh zaibatui aa ening tei Zisu khah a va hnia ka, “Abuipaw, ahomaw nama cawh a ca



lui a?” tatei a haepaw khah a cang. <sup>21</sup> Ma cawng-sawpaw cawh Piter tah a hmuh tihtah, “Abuipaw, ma cawngsawpaw kheh zekhatamaw a cang a?” tatah a hae.

<sup>22</sup> Zisu taco, “Ka vongkawnah tai za hring thlang seh tah du my neh seh la, nama na cawtah apuinah a ung maw? Va pazui thlang leh hi,” tatah a chai. <sup>23</sup> Ma rawng tahei, ma a hningzuitu heh thi a be, a tah tahpaw a vevungpaw bia cawh a hningzuitu sahlo hrong lekhei a thang. Canghrasala Zisu taco ama cawh thi a be, tah be, “Ka vongkawnah tai za hring thlang seh tah du neh seh la, nama a ca pakhangnah a ung maw?” tah suitei a reipaw a cang.

<sup>24</sup> Ma a hningzuitu heh ma hming sahlo heh reilai katei, a ciatupaw heh a cang. Ama a reipaw cawh ahmang tah kaa hni.

<sup>25</sup> Zisu tah ahringpaw hming hlupui zong a tua. Ma vytei cawh cia thlupaw cang my he seh la, cianápaw cabu cawh khazaw lehei a tlung a be, tatah ka rawh.

**Biahrai Tha, Zyphe rei**  
**New Testament in Chin, Zyphe**

copyright © 2010 Wycliffe Bible Translators, Inc.

Language: Chin, Zyphe

Translation by: Wycliffe Bible Translators, Inc.

**Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445828

**The New Testament**

in Chin, Zyphe

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 22 Feb 2024 from source files  
dated 29 Jan 2022

3ab5e66d-afb3-54e4-aefd-60f99c2a3ee9